

नमो नमो निम्मलदंसणस्स
पूज्य आनंद-क्षमा-ललित-सुशील-सुधर्मसागर गुरुभ्यो नमः

On Line – आगममंजूषा

[७] उवासगादसाओ

* संकलन एवं प्रस्तुतकर्ता *

मुनि दीपरत्नसागर [M.Com., M.Ed., Ph.D.]

॥ किंचित् प्रास्ताविकम् ॥

ये आगम-मंजूषा का संपादन आजसे ७० वर्ष पूर्व अर्थात् वीर संवत् २४६८, विक्रम संवत्-१९९८, ई.स.1942 के दौरान हुआ था, जिनका संपादन पूज्य आगमोद्धारक आचार्यश्री आनंदसागरसूरिजी म.सा.ने किया था। आज तक उन्हीं के प्रस्थापित-मार्ग की रोशनी में सब अपनी-अपनी दिशाएँ ढूँढते आगे बढ़ रहे हैं।

हम ७० साल के बाद आज ई.स.-2012, विक्रम संवत्-२०६८, वीर संवत्-२५३८ में वो ही आगम-मंजूषा को कुछ उपयोगी परिवर्तनों के साथ इंटरनेट के माध्यम से सर्वथा सर्वप्रथम “**OnLine-आगममंजूषा**” नाम से प्रस्तुत कर रहे हैं।

*** मूल आगम-मंजूषा के संपादन की किंचित् भिन्नता का स्वीकार ***

- [१] आवश्यक सूत्र-(आगम-४०) में केवल मूल सूत्र नहीं है, मूल सूत्रों के साथ निर्युक्ति भी सामिल की गई है।
[२] जीतकल्प सूत्र-(आगम-३८) में भी केवल मूल सूत्र नहीं है, मूलसूत्रों के साथ भाष्य भी सामिल किया है।
[३] जीतकल्प सूत्र-(आगम-३८) का वैकल्पिक सूत्र जो “पंचकल्प” है, उनके भाष्य को यहाँ सामिल किया गया है।

[४] “ओघनिर्युक्ति”-(आगम-४१) के वैकल्पिक आगम “पिंडनिर्युक्ति” को यहाँ समाविष्ट तो किया है, लेकिन उनका मुद्रण-स्थान बदल गया है।

[५] “कल्प(बारसा)सूत्र” को भी मूल आगममंजूषा में सामिल किया गया है।

-मुनि दीपरत्नसागर

: Address:-

Mnui Deepratnasagar,
MangalDeep society, Opp.DholeswarMandir,
POST:- THANGADH Dist.surendranagar.
Mobile:-9825967397 jainmunideepratnasagar@gmail.com

मुनि दीपरत्नसागर



७ श्रीउपासकदशाङ्गम्- तेणं कालेणं० चम्पा नामं नयरी होत्था वण्णओ, पुण्णभद्दे चेइए वण्णओ । १ । तण कालेणं० अज्जसुहम्म समासारए जाव जम्बू पज्जुवासमाणे एवं
 वयासी-जइ णं भन्ते ! समणेणं भगवया महावीरेणं जाव सम्पत्तेणं लट्ठस्स अङ्गस्स नायाधम्मकहाणं अयमट्ठे पण्णत्ते सत्तमस्स णं भन्ते ! अङ्गस्स उवा-
 सगदसाणं समणेणं जाव सम्पत्तेणं के अट्ठे पं० ? , एवं खलु जम्बू ! समणेणं जाव सम्पत्तेणं सत्तमस्स अङ्गस्स उवासगदसाणं दस अज्झयणा पं० तं० - ' आणन्दे १ कामदेवे य २, गाहा-
 वइचुलणीपिया ३ । सुरादेवे ४ चुल्लसयए ५, गाहावइकुण्डकोलिए ६ ॥ १ ॥ सद्दालपुत्ते ७ महासयए ८, नन्दिणीपिया ९ सालिहीपिया १० । जइ णं भन्ते ! समणेणं जाव सम्पत्तेणं
 सत्तमस्स अङ्गस्स उवासगदसाणं दस अज्झयणा पं० पढमस्स णं भन्ते ! समणेणं जाव सम्पत्तेणं के अट्ठे पं० ? । २ । एवं खलु जम्बू ! तेणं कालेणं० वाणियगामे नामं नयरे होत्था
 वण्णओ, तस्स णं वाणियगामस्स नयरस्स बहिया उत्तरपुरच्छिमे दिसीभाए दूइयपलासए नामं चेइए, तत्थ णं वाणियगामे नयरे जियसत्तू राया होत्था वण्णओ, तत्थ णं वाणियगामे
 आणन्दे नामं गाहावई परिवसइ अट्ठे जाव अपरिभूए, तस्स णं आणन्दस्स गाहावइस्स चत्तारि हिरण्णकोडीओ निहाणपउत्ताओ चत्तारि हिरण्णकोडीओ वुड्ढिपउत्ताओ चत्तारि
 हिरण्णकोडीओ पवित्थरपउत्ताओ चत्तारि वया दसगोसाहस्सिएणं वएणं होत्था, से णं आणन्दे गाहावई बहूणं राईसरजावसत्थवाहाणं बहूसु कज्जेसु य कारणेसु य मन्तेसु य कुडुम्बेसु
 य गुज्जेसु य रहस्सेसु य निच्छएसु य ववहारेसु य आपुच्छणिज्जे पडिपुच्छणिज्जे सयस्सवि य णं कुडुम्बस्स मेढी पमाणं आहारे आलम्बणं चक्खू मेढीभूए जाव सब्रकज्जवट्ठावए

४८६ " उपासकदशांगं, अ-५५१२८०१-१

मुनि दीपरत्नसागर

यावि होत्था, तस्स णं आणन्दस्स गाहावइस्स सिवानन्दा नामं भारिया होत्था, अहीण जाव सुरूवा, आणन्दस्स गाहावइस्स इट्ठा० आणन्देणं गाहावइणा सद्धिं अणुरत्ता अविरत्ता इट्ठा सह जाव पञ्चविहे माणुस्सए कामभोए पञ्चणुभवमाणी विहरइ, तस्स णं वाणियगामस्स बहिया उत्तरपुरच्छिमे दिसीभाए ए(प्र०त)त्थ णं कोल्लाए नामं सन्निवेसे होत्था रिद्ध-
 तिभिय जाव पासादीए०, तत्थ णं कोल्लाए सन्निवेसे आणन्दस्स गाहावइस्स बहुए मित्तनाइनियगसयणसम्बन्धिपरिजणे परिवसइ अट्ठे जाव अपरिभूए, तेणं कालेणं० समणे भगवं महावीरे जाव समोसरिए, परिसा निग्गया, कूणिए राया जहा तहा जियसत्तू निग्गच्छइ त्ता जाव पज्जुवासइ, तए णं से आणन्दे गाहावई इमीसे कहाए लद्धे समणे०, एवं खलु समणे जाव विहरइ, तं महाफलं जाव गच्छामि णं जाव पज्जुवासामि एवं सम्पेहेइ त्ता ण्हाए सुद्धप्पावेसाइं जाव अप्पमहग्घाभरणाळङ्कियसरीरे सयाओ गिहाओ पडिनिक्खमइ त्ता सकोर-
 ण्टमल्लदामेणं छत्तेणं धरिज्जमाणेणं मणुस्सवग्गुरापरिक्खित्ते पायविहारचारेणं वाणियगामं नयरं मज्झमज्झेणं निग्गच्छइ त्ता जेणामेव दूइपलासे चेइए जेणेव समणे भगवं महावीरे तेणेव उवागच्छइ त्ता तिक्खुत्तो आयाहिणं पयाहिणं करेइ त्ता वन्दइ नमंसइ जाव पज्जुवासइ । ३ । तए णं समणे भगवं महावीरे आणन्दस्स गाहावइस्स तीसे य महइमहालियाए जाव धम्मकहा, परिसा पडिगया, राया य गए । ४ । तए णं से आणन्दे गाहावई समणस्स भगवओ महावीरस्स अन्तिए धम्मं सोच्चा निसम्म हट्ठतुट्ठ जाव एवं वयासी-सइहामि णं भन्ते ! निग्गन्थं पावयणं पत्तियामि णं भन्ते ! निग्गन्थं पावयणं रोएमि णं भन्ते ! निग्गन्थं पावयणं, एवमेयं भन्ते ! तहमेयं भन्ते ! अवितहमेयं भन्ते ! इच्छियमेयं भन्ते ! पडिच्छियमेयं भन्ते ! इच्छियपडिच्छियमेयं भन्ते ! से जहेयं तुब्भे वयहत्तिकट्ठ, जहा णं देवाणुप्पियाणं अन्तिए बहवे राईसरतलवरमाडम्बियकोडुम्बियसेट्ठिसेणावइसत्थवाहप्प-
 भिइया मुण्डा भवित्ता आगाराओ अणगारियं पव्वइया नो खलु अहं तहा संचाएमि मुण्डे जाव पव्वइत्तए, अहं णं देवाणुप्पियाणं अन्तिए पञ्चाणुव्वइयं सत्तसिक्खावइयं दुवालसविहं गिहिधम्मं पडिवज्जिस्सामि, अहासुहं देवाणुप्पिया ! मा पडिबन्धं करेहि । ५ । तए णं से आणन्दे गाहावई समणस्स भगवओ महावीरस्स अन्तिए तप्पढमयाए थूलगं पाणाइवायं पच्चक्खाइ जावजीवाए दुविहंतिविहेणं न करेमि न कारवेमि मणसा वयसा कायसा, तयाणन्तरं च णं थूलगं मुसावायं पच्चक्खाइ जावजीवाए दुविहंतिविहेणं न करेमि न कारवेमि मणसा वयसा कायसा, तयाणन्तरं च णं थूलगं अदिण्णादाणं पच्चक्खाइ जावजीवाए दुविहंतिविहेणं न करेमि न कारवेमि मणसा वयसा कायसा, तयाणन्तरं च णं सदारसन्तोसीए परिमाणं करेइ नन्नत्थ एकाए सिवानन्दाए भारियाए, अवसेसं सव्वं मेहुणविहिं पच्चक्खामि, तयाणन्तरं च णं इच्छाविहिपरिमाणं करेमाणे हिरण्णसुवण्णविहिपरिमाणं करेइ नन्नत्थ चउहिं हिरण्णकोडीहिं निहाणपउत्ताहिं चउहिं बुद्धिपउत्ताहिं चउहिं पवित्थरपउत्ताहिं, अवसेसं सव्वं हिरण्णसुवण्णविहिं पच्चक्खामि०, तयाणन्तरं च णं चउप्पयविहिपरिमाणं करेइ नन्नत्थ चउहिं वएहिं दसगोसाहस्सिएणं वएणं, अवसेसं सव्वं चउप्पयविहिं पच्चक्खामि०, तयाणन्तरं च णं खेत्तवत्थुविहिपरिमाणं करेइ नन्नत्थ पञ्चहिं हलसएहिं नियत्तणसइएणं हलेणं, अवसेसं सव्वं खेत्तवत्थुविहिं पच्चक्खामि०, तयाणन्तरं च णं सगडविहिपरिमाणं करेइ नन्नत्थ पञ्चहिं सगडसएहिं दिसायत्तिएहिं पञ्चहिं सगडसएहिं संवाहणिएहिं, अवसेसं सव्वं सगडविहिं पच्चक्खामि०, तयाणन्तरं च णं वाहणविहिपरिमाणं करेइ नन्नत्थ चउहिं वाहणेहिं दिसायत्तिएहिं चउहिं वाहणेहिं संवाहणिएहिं, अवसेसं सव्वं वाहणविहिं पच्चक्खा-
 मि०, तयाणन्तरं च णं उवभोगपरिभोगविहिं पच्चक्खाएमाणे उल्लणियाविहिपरिमाणं करेइ नन्नत्थ एगाए गन्धकासाईए, अवसेसं सव्वं उल्लणियाविहिं पच्चक्खामि०, तयाणन्तरं च णं दन्तवणविहिपरिमाणं करेइ नन्नत्थ एगेणं अल्ललट्ठीमहुएणं, अवसेसं दन्तवणविहिं पच्चक्खामि०, तयाणन्तरं च णं फलविहिपरिमाणं करेइ नन्नत्थ एगेणं खीरामलएणं, अवसेसं फलविहिं पच्चक्खामि०, तयाणन्तरं च णं अब्भङ्गणविहिपरिमाणं करेइ नन्नत्थ सयपागसहस्सपागेहिं तेलेहिं, अवसेसं अब्भङ्गणविहिं पच्चक्खामि०, तयाणन्तरं च णं उव्वट्ठणविहि-
 परिमाणं करेइ नन्नत्थ एगेणं सुरहिणा गन्धट्ठएणं, अवसेसं उव्वट्ठणविहिं पच्चक्खामि०, तयाणन्तरं च णं मज्जणविहिपरिमाणं करेइ नन्नत्थ अट्ठहिं उट्ठिएहिं उदगस्स घडएहिं, अवसेसं मज्जणविहिं पच्चक्खामि०, तयाणन्तरं च णं वत्थविहिपरिमाणं करेइ नन्नत्थ एगेणं खोमजुयलेणं, अवसेसं वत्थविहिं पच्चक्खामि०, तयाणन्तरं च णं विलेवणविहिपरिमाणं करेइ नन्नत्थ अगुरुकुड्कुमचन्दणमाइएहिं, अवसेसं विलेवणविहिं पच्चक्खामि०, तयाणन्तरं च णं पुप्फविहिपरिमाणं करेइ नन्नत्थ एगेणं सुद्धपउमेणं मालइकुसुमदामेण वा, अवसेसं पुप्फ-
 विहिं पच्चक्खामि०, तयाणन्तरं च णं आभरणविहिपरिमाणं करेइ नन्नत्थ मट्ठकण्णेजएहिं नाममुद्दाए य, अवसेसं आभरणविहिं पच्चक्खामि०, तयाणन्तरं च णं धूवणविहिपरिमाणं करेइ नन्नत्थ अगुरुतुरुक्कधूवमाइएहिं, अवसेसं धूवणविहिं पच्चक्खामि०, तयाणन्तरं च णं भोयणविहिपरिमाणं करेमाणे पेज्जविहिपरिमाणं करेइ नन्नत्थ एगाए कट्ठपेज्जाए, अवसेसं पेज्जविहिं पच्चक्खामि०, तयाणन्तरं च णं भक्खविहिपरिमाणं करेइ नन्नत्थ एगेहिं घयपुण्णेहिं खण्डखजएहिं वा, अवसेसं भक्खविहिं पच्चक्खामि०, तयाणन्तरं च णं ओय-

४८७ उपासकदशांगं, - ३१५४२८८८ - १

मुनि दीपरत्नसागर

णविहिपरिमाणं करेइ नन्नत्थ कलमसालिओदणेणं, अवसेसं ओयणविहिं पच्चक्खामि०, तयाणन्तरं च णं सूवविहिपरिमाणं करेइ नन्नत्थ कलायसूवेण वा मुग्गसूवेण वा माससूवेण वा, अवसेसं सूवविहिं पच्चक्खामि०, तयाणन्तरं च णं घयविहिपरिमाणं करेइ नन्नत्थ सारइएणं गोघयमण्डेणं, अवसेसं घयविहिं पच्चक्खामि०, तयाणन्तरं च णं सागविहिपरिमाणं करेइ नन्नत्थ वत्थु(प्र० वुप्पु)साएण वा चूचुसाएण वा तुंबसाएण वा सुत्थियसाएण वा मण्डुक्कियसाएण वा, अवसेसं सागविहिं पच्चक्खामि०, तयाणन्तरं च णं माहुरयविहिपरिमाणं करेइ नन्नत्थ एगेणं पालङ्गामाहुरएणं, अवसेसं माहुरयविहिं पच्चक्खामि०, तयाणन्तरं च णं जेमणविहिपरिमाणं करेइ नन्नत्थ सेहंबदालियंबेहिं, अवसेसं जेमणविहिं पच्चक्खामि०, तयाणन्तरं च णं पाणियविहिपरिमाणं करेइ नन्नत्थ एगेणं अन्तलिकखोदएणं, अवसेसं पाणियविहिं पच्चक्खामि०, तयाणन्तरं च णं मुहवासविहिपरिमाणं करेइ नन्नत्थ पञ्चसोगन्धिएणं तम्बोलेणं, अवसेसं मुहवासविहिं पच्चक्खामि०, तयाणन्तरं च णं चउच्चिहं अणट्टादण्डं पच्चक्खाइ तं०-अवज्झाणायरियं पमायायरियं हिंसपपाणं पावकम्मोवएसं । ६ । इह खलु आणन्दाइ ! समणे भगवं महावीरे आणन्दं समणोवासणं एवं वयासी-एवं खलु आणन्दा ! समणोवासएणं अभिगयजीवाजीवेणं जाव अणइक्कमणिज्जेणं सम्मत्तस्स पञ्च अइयारा पेयात्ता जाणियद्वा न समायरियद्वा तं०-सङ्का कङ्का विइगिच्छा परपासण्डपसंसा परपासण्डसंथवे, तयाणन्तरं च णं थूलगस्स पाणाइवायवेरमणस्स समणोवासएणं पञ्च अइयारा पेयात्ता जाणियद्वा न समायरियद्वा तं०-बन्धे वहे छविच्छेए अइभारे भत्तपाणवोच्छेए, तयाणन्तरं च णं थूलगस्स मुसावायवेरमणस्स पञ्च अइयारा जाणियद्वा न समायरियद्वा तं०-सहसा-अब्भक्खाणे रहसाअब्भक्खाणे सदारमन्तमेए मोसोवएसे कूडलेहकरणे (कन्नालियं गवालियं भूमालियं नासावहारे कूडसक्खिज्जं संधिकरणे पा०), तयाणन्तरं च णं थूलगस्स अदि-ण्णादाणवेरमणस्स पञ्च अइयारा जाणियद्वा न समायरियद्वा तं०-तेणाहडे तक्करप्पओगे विरुद्धरजाइक्कमे कूडतुलकूडमाणे तप्पडिरूवगववहारे, तयाणन्तरं च णं सदारसन्तोसीए पञ्च अइयारा जाणियद्वा न समायरियद्वा तं०-इत्तरियपरिग्गहियागमणे अपरिग्गहियागमणे अणङ्गकिड्डा परविवाहकरणे कामभोगतिद्वाभिलासे, तयाणन्तरं च णं इच्छापपरिमाणस्स समणोवासएणं पञ्च अइयारा जाणियद्वा न समायरियद्वा तं०-खेत्तवत्थुपमाणाइक्कमे हिरण्णसुवण्णपमाणाइक्कमे दुपयचउप्पयपमाणाइक्कमे धणधन्नपमाणाइक्कमे कुवियपमाणाइक्कमे, तयाणन्तरं च णं दिसिवयस्स पञ्च अइयारा जाणियद्वा न समायरियद्वा तं०-उड्ढदिसिपमाणाइक्कमे अहोदिसिपमाणाइक्कमे तिरियदिसिपमाणाइक्कमे खेत्तवुड्ढी सइअन्तरद्वा, तयाणन्तरं च णं उवभोगपरिभोगे दुविहे पं० तं०-भोयणओ य कम्मओ य, तत्थ णं भोयणओ समणोवासएणं पञ्च अइयारा जाणियद्वा न समायरियद्वा तं०-सचित्ताहारे सचित्तपडिबद्धा-हारे अप्पउलिओसहिभक्खणया दुप्पउलिओसहिभक्खणया तुच्छोसहिभक्खणया, कम्मओ णं समणोवासएणं पणरस कम्मादाणाइं जाणियद्वाइं न समायरियद्वाइं तं०-इङ्गाल-कम्मे वणकम्मे साडीकम्मे भाडीकम्मे फोडीकम्मे दन्तवाणिज्जे लक्खवाणिज्जे रसवाणिज्जे विसवाणिज्जे केसवाणिज्जे जन्तपीलणकम्मे निहृञ्छणकम्मे दवग्गिदावणया सरदहतला-गपरिसोसणया असईजणपोसणया, तयाणन्तरं च णं अणट्टदण्डवेरमणस्स समणोवासएणं पञ्च अइयारा जाणियद्वा न समायरियद्वा तं०-कन्दप्पे कुकुइए मोहरिए सञ्जुत्ताहिगरणे उवभोगपरिभोगाइरित्ते, तयाणन्तरं च णं सामाइयस्स समणोवासएणं पञ्च अइयारा जाणियद्वा न समायरियद्वा तं०-मणदुप्पणिहाणे वयदुप्पणिहाणे कायदुप्पणिहाणे सामाइयस्स सइअकरणया सामाइयस्स अणवट्टियस्स करणया, तयाणन्तरं च णं देसावगासियस्स समणोवासएणं पञ्च अइयारा जाणियद्वा न समायरियद्वा तं०-आणवणप्पओगे पेसवणप्पओगे सदाणुवाए रूवाणुवाए बहियापोग्गलपूक्खेवे, तयाणन्तरं च णं पोसहोववासस्स समणोवासएणं पञ्च अइयारा जाणियद्वा न समायरियद्वा तं०-अप्पडिलेहियदुप्पडिलेहियसिज्जासंथारे अप्पमज्जियदुप्पमज्जियसिज्जासंथारे अप्पडिलेहियदुप्पडिलेहियउच्चारपासवणभूमी अप्पमज्जियदुप्पमज्जियउच्चारपासवणभूमी पोसहोववासस्स सम्मं अणणुपालणया, तयाणन्तरं च णं अहा(अतिहि)संविभागस्स समणोवासएणं पञ्च अइयारा जाणियद्वा न समायरियद्वा तं०-सचित्तनिक्खेवणया सचित्तपिहणया कालाइक्कमे परववदेसे मच्छरिया, तयाणन्तरं च णं अपच्छिममारणन्तियसंलेहणाझूसणाराहणाए पञ्च अइयारा जाणियद्वा न समायरियद्वा तं०-इहलोगासंसप्पओगे परलोगासंसप्पओगे जीवियासंसप्पओगे मरणासंसप्पओगे कामभो-गासंसप्पओगे । ७ । तए णं से आणन्दे गाहावई समणस्स भगवओ महावीरस्स अन्तिए पंचाणुव्वइयं सत्तसिक्खावइयं दुवालसविहं सावयधम्मं पडिवज्जित्ता समणं भंगवं महावीरं वन्दइ नमंसइ त्ता एवं वयासी-नो खलु मे भन्ते ! कप्पइ अज्जप्पभिइ अन्नउत्थिए वा अन्नउत्थियदेवयाणि वा अन्नउत्थियपरिग्गहियाणि अरिहंतचेइयाइं वा वन्दित्तए वा नमंसित्तए वा पुब्बिं अणालत्तेणं आलवित्तए वा संलवित्तए वा, तेसिं असणं वा पाणं वा खाइमं वा साइमं वा दाउं वा अणुप्पदाउं वा नन्नत्थ रायाभिओगेणं गणाभिओगेणं बलाभिओगेणं देवया-भिओगेणं गुरुनिग्गहेणं वित्तिकन्तारेणं, कप्पइ मे समणे निग्गन्थे फासुएणं एसणिज्जेणं असणपाणखाइमसाइमेणं वत्थपडिग्गहकम्बलपायपुञ्छणेणं पीढफलगसिज्जासंथारएणं ओस-हभेसजेण य पडिलाभेमाणस्स विहरित्तएत्तिकट्टु इमं एयारूवं अभिग्गहं अभिगिण्हइ त्ता पसिणाइं पुच्छइ त्ता अट्टाइं आदियइ त्ता समणं भगवं महावीरं तिक्खुत्तो वन्दइ (१२२)

ता समणस्स भगवओ महावीरस्स अन्नियाओ दूईपत्तासाओ चेइयाओ पडिणिक्खमइ ता जेणेव वाणियगामे नयरे जेणेव सए गिहे तेणेव उवागच्छइ ता सिवानन्दं भारियं एवं वयासी-एवं खलु देवाणुप्पिया ! मए समणस्स भगवओ महावीरस्स अन्तिए धम्मं निसन्ते. सेविय धम्मं मे इच्छिए पडिच्छिए अभिरुइए, तं गच्छ णं तुमं देवाणुप्पिया ! समणं भगवं महावीरं वन्दाहि जाव पज्जुवासाहि. समणस्स भगवओ महावीरस्स अन्तिए पञ्चाणुवइयं सत्तसिक्खावइयं दुवालसविहं गिहिधम्मं पडिवज्जाहि । ८ । तए णं सा सिवानन्दा भारिया आणन्देणं समणोवासएणं एवं वुत्ता समाणा हट्टुट्टा कोडुम्बियपुरिसे सदावेइ ता एवं वयासी-खिप्पामेव लहुकरण जाव पज्जुवासइ. तए णं समणे भगवं महावीरे सिवानन्दाए तीसे य महइ जाव धम्मं कहेइ (प्र० धम्मकहा), तए णं सा सिवानन्दा समणस्स भगवओ महावीरस्स अन्तिए धम्मं सोच्चा निसम्म हट्ट जाव गिहिधम्मं पडिवज्जइ ता तमेव धम्मियं जाणप्पवरं दूरुहइ ता जामेव दिसं पाउब्भूया तामेव दिसं पडिगया । ९ । भन्ते ! त्ति भगवं गोयमे समणं भगवं महावीरं वन्दइ नमंसइ ता एवं वयासी-पहू णं भन्ते ! आणन्दे सम-णोवासए देवाणुप्पियाणं अन्तिए मुण्डे जाव पवइत्तए ? . नो तिणट्टे समट्टे, गोयमा ! आणन्दे णं समणोवासए बहूइं वासाइं समणोवासगपरियागं पाउणिहिइ ता जाव सोहम्मं कप्पे अरुणे विमाणे देवत्ताए उववज्जिहिइ. तत्थ णं अत्थेगइयाणं देवाणं चत्तारि पलिओवमाइं ठिई पं०, तत्थ णं आणन्दस्सवि समणोवासगस्स चत्तारि पलिओवमाइं ठिई पं०. तए णं समणे भगवं महावीरे अन्नया कयाई बहिया जाव विहरइ । १० । तए णं से आणन्दे समणोवासए जाए अभिगयजीवाजीवे जाव पडिलाभेमाणे विहरइ. तए णं सा सिवानन्दा भारिया समणोवासिया जाया जाव पडिलाभेमाणी विहरइ । ११ । तए णं तस्स आणन्दस्स समणोवासगस्स उच्चावएहिं सीलवयगुणवेरमणपच्चक्खाणपोसहोववासेहिं अप्पाणं भावेमाणस्स चोइस्स संवच्छराइं वइक्कन्ताइं पण्णरसमस्स संवच्छरस्स अन्तरा वट्टमाणस्स अन्नया कयाई पुव्वरत्तावरत्तकालसमयंसि धम्मजागरियं जागरमाणस्स इमेयारूवे अज्झत्थिए चिन्तिए पत्थिए मणोगए सङ्कप्पे समुप्पज्जित्था-एवं खलु अहं वाणियगामे नयरे बहूणं राईसर जाव सयस्सविय णं कुडुम्बस्स जाव आधारे, तं एएणं विक्खेवेणं अहं नो संचाएमि समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरित्तए, तं सेयं खलु ममं कल्लं जाव जलन्ते विउलं असणं० जहा पूरणो जाव जेट्टपुत्तं कुडुम्बे ठवेत्ता तं मित्त जाव जेट्टपुत्तं च आपुच्छित्ता कोल्लाए सन्निवेसे नायकुलंसि पोसहसालं पडिलेहिता समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरित्तए, एवं सम्पेहेइ ता कल्लं० विउलं तहेव जिमियभुत्तुरागए तं मित्त जाव विउलेणं पुप्फ० सक्कारेइ सम्माणेइ ता तस्सेव मित्त जाव पुरओ जेट्टपुत्तं सदावेइ ता एवं वयासी-एवं खलु पुत्ता ! अहं वाणियगामे बहूणं राईसर जहा चिन्तियं जाव विहरित्तए, तं सेयं खलु मम इदाणिं तुमं सयस्स कुडुम्बस्स आलम्बण० ठवेत्ता जाव विहरित्तए, तए णं जेट्टपुत्ते आणन्दस्स समणोवासगस्स तहत्ति एयमट्टं विणएणं पडिसुणेइ, तए णं से आणन्दे समणोवासए तस्सेव मित्त जाव पुरओ जेट्टपुत्तं कुडुम्बे ठवेइ ता एवं वयासी-मा णं देवाणुप्पिया ! तुब्भे अज्जप्पभिई केई मम बहूसु कज्जेसु जाव पुच्छउ वा पडिपुच्छउ वा ममं अट्टाए असणं वा० उवक्खडेउ वा उवकरेउ वा, तए णं से आणन्दे समणोवासए जेट्टपुत्तं मित्तनाइ० आपुच्छइ ता सयाओ गिहाओ पडि-णिक्खमइ ता वाणियगामं नयरं मज्झमज्जेणं निग्गच्छइ ता जेणेव कोल्लाए सन्निवेसे जेणेव नायकुले जेणेव पोसहसाला तेणेव उवागच्छइ ता पोसहसालं पमज्जइ ता उच्चारपासव-णभूमिं पडिलेहेइ ता दब्भसंथारयं संथरइ ता दब्भसंथारयं दूरुहइ ता पोसहसालाए पोसहिए दब्भसंथारोवगए समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरइ । १२ । तए णं से आणन्दे समणोवासए उवासगपडिमाओ उवसम्पज्जित्ताणं विहरइ, पढमं उवासगपडिमं अहासुत्तं अहाकप्पं अहामग्गं अहातच्चं सम्मं काएणं फासेइ पालेइ सोहेइ तीरेइ किट्टेइ आराहेइ तए णं से आणन्दे समणोवासए दोच्चं उवासगपडिमं एवं तच्चं चउत्थं पञ्चमं छट्ठं सत्तमं अट्ठमं नवमं दसमं एक्कारसमं जाव आराहेइ । १३ । तए णं से आणन्दे समणोवासए इमेणं एयारूवेणं उरालेणं विउलेणं पयत्तेणं पग्गहिएणं तवोकम्मणं सुक्के जाव किसे धमणिसन्तए जाए, तए णं तस्स आणन्दस्स समणोवासगस्स अन्नया कयाई पुव्वरत्ता जाव धम्मजागरियं जागरमाणस्स अयं अज्झत्थिए० एवं खलु अहं इमेणं जाव धमणिसन्तए जाए तं अत्थि ता मे उट्टाणे कम्मं बले वीरिए पुरिसक्कारपरक्कमे सद्वाधिइसंवेगे तं जावता मे अत्थि उट्टाणे सद्वाधिइसंवेगे जाव य मे धम्मायरिए धम्मोवएसए समणे भगवं महावीरे जिणे सुहत्थी विहरइ तावता मे सेयं कल्लं जाव जलन्ते अपच्छिममारणन्ति-यसंलेहणाझूसणाझूसियस्स भत्तपाणपडियाइक्खियस्स कालं अणवक्कमाणस्स विहरित्तए, एवं सम्पेहेइ ता कल्लं पाउ जाव अपच्छिममारणन्तिय जाव कालं अणवक्कमाणे विहरइ, तए णं तस्स आणन्दस्स समणोवासगस्स अन्नया कयाई सुभेणं अज्झवसाणेणं सुभेणं (प्र० सोहणेणं) परिणामेणं लेसाहिं विसुज्झमाणीहिं तदावरणिज्जाणं कम्माणं खओवसमेणं ओहिनाणे समुप्पन्ने, पुरत्थिमेणं लवणसमुदे पञ्चजोयणसयाइं खेत्तं जाणइ पासइ एवं दक्खिणेणं पच्चत्थिमेणं य उत्तरेणं जाव चुल्लहिमवन्तं वासधरपव्वयं जाणइ पासइ उड्डं जाव

सोहम्मं कप्पं जाणइ पासइ अहे जाव इमीसे रयणप्पभाए पुढवीए लोलुयच्चुयं नरयं चउरासीइवाससहस्सट्ठिइयं जाणइ पासइ । १४ । तेणं कालेणं० समणे भगवं महावीरे समोसरिए, परिसा निग्गया जाव पडिगया, तेणं कालेणं० समणस्स भगवओ महावीरस्स जेट्ठे अन्तेवासी इन्दभूई नामं अणगारे गोयमे गोत्तेणं सत्तुस्सेहे समचउरंसंठाणसंठिए वज्जरिसहना- रायसङ्खयणे कणगपुलगनिघसपम्हगोरे उग्गस्तवे दित्ततवे तत्ततवे घोरतवे महातवे उराले घोरगुणे घोरतवस्सी घोरबम्भचेरवासी उच्छूढसरीरे सङ्घित्तविउल्लतेउलेसे छट्ठंछट्ठेणं अणिक्व- त्तेणं तवोकम्मेणं संजमेणं तवसा अप्पाणं भावेमाणे विहरइ, तए णं से भगवं गोयमे छट्ठक्खमणपारणगंसि पढमाए पोरिसीए सज्झायं करेइ बिइयाए पोरिसीए झाणं झियाइ तइयाए पोरिसीए अतुरियं अचवलं असम्भन्ते मुहपुत्तिं पडिलेहेइ ता भायणवत्थाइं पडिलेहेइ ता भायणवत्थाइं पमज्जइ ता भायणाइं उग्गाहेइ ता जेणेव समणे भगवं महावीरे तेणेव उवा- गच्छइ ता समणं भगवं महावीरं वंदइ नमंसइ ता एवं वयासी-इच्छामि णं भन्ते ! तुब्भेहिं अब्भणुण्णाए छट्ठक्खमणपारणगंसि वाणियगामे नयरे उच्चनीयमज्झिमाइं कुलाइं घरसमु- दाणस्स भिक्खायरियाए अडित्तए, अहासुहं देवाणुप्पिया ! मा पडिबन्धं करेह, तए णं भगवं गोयमे समणेणं भगवया महावीरेण अब्भणुण्णाए समाणे समणस्स भगवओ महावीरस्स अन्तियाओ दूइपलासाओ चेइयाओ पडिणिक्वमइ ता अतुरियमचवलमसम्भन्ते जुगन्तरपरिलोयणाए दिट्ठीए पुरओ ईरियं सोहेमाणे जेणेव वाणियगामे नयरे तेणेव उवागच्छइ ता वाणियगामे नयरे उच्चनीयमज्झिमाइं कुलाइं घरसमुदाणस्स भिक्खायरियाए अडइ, तए णं से भगवं गोयमे वाणियगामे नयरे जहा पण्णत्तीए तहा जाव भिक्खायरियाए अडमाणे अहापज्जत्तं भत्तपाणं सम्मं पडिग्गाहेइ ता वाणियगामाओ पडिणिग्गच्छइ ता कोह्णायस्स सन्निवेसस्स अदूरसामन्तेणं वीईवयमाणे बहुजणसइं निसामेइ-बहुजणो अन्नमन्नस्स एवमा- इक्खइ० एवं खलु देवाणुप्पिया ! समणस्स भगवओ महावीरस्स अन्तेवासी आणन्दे नामं समणोवासए पोसहसालाए अपच्छिम जाव अणवकङ्कमाणे विहरइ, तए णं तस्स गोयमस्स बहुजणस्स अन्तिए एयं अट्ठं सोच्चा निसम्म अयमेयारूवे अज्झत्थिए०-तं गच्छामि णं आणन्दं समणोवासयं पासामि एवं सम्पेहेइ ता जेणेव कोह्णाय सन्निवेसे जेणेव आणन्दे समणोवासए जेणेव पोसहसाला तेणेव उवागच्छइ, तए णं से आणन्दे समणोवासए भगवं गोयमं एज्जमाणं पासइ ता हट्ठ जाव हियए भगवं गोयमं वन्दइ नमंसइ ता एवं वयासी- एवं खलु भन्ते ! अहं इमेणं उरालेणं जाव धमणिसन्तए जाए नो संचाएमि देवाणुप्पियस्स अन्तियं पाउब्भवित्ताणं तिक्खुत्तो मुद्धानेणं पाए अभिवन्दिताए तुब्भे णं भन्ते ! इच्छा- कारेणं अणभिओयेणं इओ चेव एह जा णं देवाणुप्पियाणं तिक्खुत्तो मुद्धानेणं पाएसु वन्दामि नमंसामि, तए णं से भगवं गोयमे जेणेव आणन्दे समणोवासए तेणेव उवागच्छइ । १५ । तए णं से आणन्दे समणोवासए भगवओ गोयमस्स तिक्खुत्तो मुद्धानेणं पाएसु वन्दइ नमंसइ ता एवं वयासी-अत्थि णं भन्ते ! गिहिणो गिहमज्झावसन्तस्स ओहिनाणे समुप्पज्जइ ?, हन्ता अत्थि, जइ णं भन्ते ! गिहिणो जाव समुप्पज्जइ एवं खलु भन्ते ! ममवि गिहिणो गिहमज्झावसन्तस्स ओहिनाणे समुप्पज्जे, पुरच्छिमेणं लवणसमुहे पञ्चजोयणसयाइं जाव लोलुयच्चुयं नरयं जाणामि पासामि, तए णं से भगवं गोयमे आणन्दं समणोवासयं एवं वयासी-अत्थि णं आणन्दा ! गिहिणो जाव समुप्पज्जइ, नो चेव णं एअमहालए तं णं तुमं आणन्दा ! एयस्स ठाणस्स आलोएहि जाव तवोकम्मं पडिवज्जाहि, तए णं से आणन्दे समणोवासए भगवं गोयमं एवं वयासी-अत्थि णं भन्ते ! जिणवयणे सन्ताणं तच्चाणं तहियाणं सब्भूयाणं भावाणं आलोइज्जइ जाव पडिवज्जिज्जइ ?, नो तिणट्ठे समट्ठे, जइ णं भन्ते ! जिणवयणे संताणं जाव भावाणं नो आलोइज्जइ जाव तवोकम्मं नो पडिवज्जिज्जइ तं णं भन्ते ! तुब्भे चेव एयस्स ठाणस्स आलोएह जाव पडिवज्जह, तए णं से भगवं गोयमे आणन्देणं समणोवासएणं एवं वुत्ते समाणे सङ्घिए कङ्घिए विइगिच्छासमावन्ने आणन्दस्स अन्तियाओ पडिणि- क्वमइ ता जेणेव दूइपलासे चेइए जेणेव समणे भगवं महावीरे तेणेव उवागच्छइ ता समणस्स भगवओ महावीरस्स अदूरसामन्ते गमणागमणाए पडिक्कमइ ता एसणमणेसणं आलो- एइ ता भत्तपाणं पडिदंसेइ ता समणं भगवं महावीरं वन्दइ नमंसइ ता एवं वयासी-एवं खलु भन्ते ! अहं तुब्भेहिं अब्भणुण्णाए तं चेव सब्भं केहेइ जाव तए णं अहं सङ्घिए० आणन्दस्स समणोवासगस्स अन्तियाओ पडिणिक्वमामि ता जेणेव इहं तेणेव हव्वमागए, तं णं भन्ते ! किं आणन्देणं समणोवासएणं तस्स ठाणस्स आलोएयव्वं जाव पडिवज्जेयव्वं उदाहु मए ?, गोयमाइ ! समणे भगवं महावीरे भगवं गोयमं एवं वयासी-गोयमा ! तुमं चेव णं तस्स ठाणस्स आलोएहि जाव पडिवज्जाहि, आणन्दं च समणोवासयं एयमट्ठं खामेहि, तए णं से भगवं गोयमे समणस्स भगवओ महावीरस्स तहत्ति एयमट्ठं विणएणं पडिसुणेइ ता तस्स ठाणस्स आलोएइ जाव पडिवज्जइ, आणन्दं च समणोवासयं एयमट्ठं खामेइ, तए णं समणे भगवं महावीरे अन्नया कयाई बहिया जणवयविहारं विहरइ । १६ । तए णं से आणन्दे समणोवासए बहूहिं सीलवय० जाव अप्पाणं भावेत्ता वीसं वासाइं समणोवासगपरियागं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अत्ताणं झूसित्ता सट्ठिं भत्ताइ अणसणाए छेदेत्ता आलोइयपडिक्कन्ते समाहिपत्ते कालमासे कालं

किञ्चा सोहम्मे कप्पे सोहम्मवडिंसगस्स महाविमाणस्स उत्तरपुरत्थिमेणं अरुणे विमाणे देवत्ताए उववन्ने, तत्थ णं अत्थेगइयाणं देवाणं चत्तारि पत्तिओवमाइं ठिई पं० तत्थ णं आण-
 न्दस्सवि देवस्स चत्तारि पत्तिओवमाइं ठिई पं०, आणन्दे णं भन्ते ! देवे ताओ देवलोगाओ आउक्खएणं० अणन्तरं चयं चइत्ता कहिं गच्छिहिइ कहिं उवज्जिहिइ ?, गोयमा ! महा-
 विदेहे वासे सिज्झिहिइ, निक्खेवो । १७ ॥ **आणन्दज्झयणं १ ॥** जइ णं भन्ते ! समणेणं भगवया महावीरेणं जाव सम्पत्तेणं सत्तमस्स अङ्गस्स उवासगदसाणं पढमस्स अज्झयणस्स
 अयमट्ठे पं० दोच्चस्स णं भन्ते ! अज्झयणस्स के अट्ठे पं० ?, एवं खलु जम्बू ! तेणं कालेणं० चम्पा नामं नयरी होत्था पुण्णभदे चेइए जियसत्तू राया कामदेवे गाहावई भद्दा भारिया
 छ हिरण्णकोडीओ निहाणपउत्ताओ छ वुड्ढिपउत्ताओ छ पवित्थरपउत्ताओ छ ब्रया दसगोसाहस्सिएणं वएणं समोसरणं जहा आणन्दो तहा निग्गओ तहेव सावयधम्मं पडिवज्जइ
 सा चेव वत्तब्रया जाव जेट्ठपुत्तं मित्तनाइ० आपुच्छित्ता जेणेव पोसहसाला तेणेव उवागच्छइ त्ता जहा आणन्दो जाव समणस्स भगवओ महावीरस्स अन्तियं धम्मपण्णत्ति उवसम्प-
 जित्ताणं विहरइ । १८ । तए णं तस्स कामदेवस्स समणोवासगस्स पुब्बरत्तावरत्तकालसमयंसि एगे देवे मायी मिच्छादिट्ठी अन्तियं पाउब्भूए, तए णं से देवे एगं महं पिसायरूव
 विउब्बइ तस्स णं देवस्स पिसायरूवस्स इमे एयारूवे वण्णावासे पं०, सीसं से गोकिलञ्जसंठाणसंठियं (विगयक्कप्पयनिभं, वियडकोप्परनिभं पा०) सालिभसेल्लसरिसा से केसा कविला
 तेएणं दिप्पमणा उट्ठियाकभल्लसंठाणसंठियं (महल्लिउट्ठियाकभल्लसरिसोवमं पा०) निडालं मुगुंसपुंछं व तस्स भुमगाओ फुग्गफुग्गाओ (जडिलकुडिलाओ पा०) विगयबीभच्छदंसणाओ
 सीसघडिविणिग्गयाइं अच्छीणि विगयबीभच्छदंसणाइं कण्णा जह सुप्पकत्तरं चेव विगयबीभच्छदंसणिज्जा उरब्भपुडसन्निभा (उरब्भपुडसंठाणसंठिया पा०) से नासा झुसिरा जम-
 लचुल्लीसंठाण (महल्लकुब्ब पा०) संठिया दोवि तस्स नासापुडया (कवोला पा०) घोडयपुंछं व तस्स मंसूइं कविलकविलाइं विगयबीभच्छदंसणाइं (फरुसाओ उद्धलोमाओ दाढियाओ
 पा०) उट्ठा उट्ठस्स चेव लम्बा (से घोडगस्स जहा दोऽवि लम्बमाणा पा०) फालसरिसा से दन्ता जिम्भा जहा सुप्पकत्तरं चेव विगयबीभच्छदंसणिज्जा (हिंगुलुयधाउकंदरबिल्लं व तस्स
 वयणं पा०) हलकुद्दालसंठिया से हणुया गल्लकडिल्लं व तस्स खड्डं फुट्टं कविलं फरुसं महल्लं मुइङ्गाकारोवमे से खन्धे पुरवरकवाडोवमे से वच्छे कोट्टियासंठाणसंठिया दोवि तस्स
 बाहा निसापाहाणसंठाणसंठिया दोवि तस्स अग्गहत्था निसालोढसंठाणसंठियाओ हत्थेसु अङ्गुलीओ सिप्पिपुडगसंठिया से नक्खा (अडयालगसंठियाओ उहा तस्स रोमगुविल्लो
 पा०) ण्हावियपसेवओ व उरंसि लम्बन्ति दोवि तस्स थणया पोट्टं अयकोट्टओ व वट्टं पाणकलंदसरिसा से नाही (भग्गकडीविगयवंकपट्टीअसरिसा दोवि तस्स किसगा पा०) सिक्कगसं-
 ठाणसंठिया से नेत्ते किण्णपुडसंठाणसंठिया दोवि तस्स वसणा जमलकोट्टियासंठाणसंठिया दोवि तस्स ऊरू अज्जुणगुट्टं व तस्स जाणूइं कुडिलकुडिलाइं विगयबीभच्छदंसणाइं जङ्घाओ
 कक्कडीओ लोमेहिं उवचियाओ अहरीलोढसंठाणसंठिया दोवि तस्स पाया अहरीलोढसंठाणसंठियाओ पाएसु अङ्गुलीओ सिप्पिपुडसंठिया से नक्खा लडहमडह जाणुए विगयभ-
 ग्गभुग्गभुमए (असिमुसगमहिसकालए भरियमेहवण्णे लंबोट्टे निग्गयदंते पा०) अवदालियवयणविवरनिह्वालियग्गजीहे सरडकयमालियाए उन्दुरमात्तापरिणद्धगुकयचिन्धे नउलक-
 यकण्णपूरे सप्पकयवेगच्छे अप्फोडन्ते (मूसगकयभुंभुलए विच्छुयकयवेयच्छे सप्पकयजण्णोवडए अभिन्नमुहनयणनक्खवरवग्घचित्तनियंसणे पा०) अभिगज्जन्ते विमुक्कट्टहासे नाणा-
 विहपञ्चवण्णेहिं लोमेहिं उवचिए एगं महं नीलुप्पलगवल्लगुलियअयसिकुसुमप्पगासं असिं खुरधारं गहाय जेणेव पोसहसाला जेणेव कामदेवे समणोवासए तेणेव उवागच्छइ त्ता आसुरुत्ते
 रुट्ठे कुविए चण्डिक्किए मिसिमिसीयमाणे कामदेवं समणोवासयं एवं व०-हंभो कामदेवा समणोवासया ! अप्पत्थियपत्थिया दुरन्तपन्तलक्खणा हीणपुण्णचाउदसिया सिरिहिरिधिइ-
 कित्तिपरिवज्जिया धम्मकामया पुण्णकामया सग्गकामया मोक्खकामया धम्मकङ्किया० धम्मपिवासिया० नो खलु कप्पइ तव देवाणुप्पिया ! जं सीलाइं वयाइं वेरमणाइं पच्चक्खाणाइं
 पोसहोववासाइं चालित्तए वा खोभित्तए वा खण्डित्तए वा भञ्जित्तए वा उज्झित्तए वा परिचइत्तए वा, तं जइ णं तुमं अज्ज सीलाइं जाव पोसहोववासाइं न लड्डमि न भञ्जेसि तो ते
 अहं अज्ज इमेणं नीलुप्पल जाव असिणा खण्डाखण्डिं करेमि, जहा णं तुमं देवाणुप्पिया ! अट्ठदुहट्टवसट्ठे अकाले चेव जीवियाओ ववरोविज्जसि, तए णं से कामदेवे समणोवासए तेणं
 देवेणं पिसायरूवेणं एवं वुत्ते समाणे अभीए अतत्थे अणुद्विग्गे अक्खुभिए अचलिए असम्भन्ते तुसिणीए धम्मज्झाणोवगए विहरइ । १९ । तए णं से देवे पिसायरूवे कामदेवं समणो-
 वासयं अभीयं जाव धम्मज्झाणोवगयं विहरमाणं पासइ त्ता दोच्चं पि तच्चं पि कामदेवं एवं व०-हंभो कामदेवा समणोवासया ! अप्पत्थियपत्थिया० जइ णं तुमं अज्ज जाव ववरोवि-
 ज्जसि, तए णं से कामदेवे समणोवासए तेणं देवेणं दोच्चं पि तच्चं पि एवं वुत्ते समाणे अभीए जाव धम्मज्झाणोवगए विहरइ, तए णं से देवे पिसायरूवे कामदेवं समणोवासयं अभीयं
 जाव विहरमाणं पासइ त्ता आसुरुत्ते० तिवलियं भिउडिं निडाले साहट्टु कामदेवं समणोवासयं नीलुप्पल जाव असिणा खण्डाखण्डिं करेइ, तए णं से कामदेवे समणोवासए तं उज्जलं

जाव दुरहियासं वेयणं सम्मं सहइ जाव अहियासेइ । २० । तए णं से देवे पिसायरूवे कामदेवं समणोवासयं अभीयं जाव विहरमाणं पासइ ता जाहे नो संचाएइ कामदेवं समणोवा-
 सयं निगन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते तन्ते परितन्ते सणियं सणियं पच्चोसकइ ता पोसहसालाओ पडिणिक्खमइ ता दिव्वं पिसा-
 यरूवं विप्पजहइ ता एगं महं दिव्वं हत्थिरूवं विउव्वइ, सत्तङ्गपइट्ठियं सम्मंसंठियं सुजायं पुरओ उदग्गं पिट्ठओ वराहं अयाकुच्चिं अलम्बकुच्चिं पलम्बलम्बोदराधरकरं अब्भुग्गयमउ-
 लमल्लियाविमलधवलदन्तं कञ्चणकोसीपविट्ठदन्तं आणामियचावललियसंवल्लियग्गसोण्डं कुम्मपडिपुण्णचलणं वीसइनक्खं अल्लिणपमाणजुत्तपुच्छं मत्तं मेहमिव गुल्लुलेन्तं मणप-
 वणजइणवेगं दिव्वं हत्थिरूवं विउव्वइ ता जेणेव पोसहसाला जेणेव कामदेवे समणोवासए तेणेव उवागच्छइ ता कामदेवं समणोवासयं एवं व०-हंभो कामदेवा समणोवासया ! तहेव
 भणइ जाव न भञ्जेसि तो तं अज्ज अहं सोण्डाए गिण्हामि ता पोसहसालाओ नीणेमि ता उड्ढं वेहासं उव्विहामि ता तिक्खेहिं दंतमुसलेहिं पडिच्छामि ता अहेधरणितलंसि तिक्खुत्तो
 पाएसु लोलेमि जहा णं तुमं अट्ठदुहट्ठवसट्ठे अकाले चेव जीवियाओ ववरोविज्जसि, तए णं से कामदेवे समणोवासए तेणं देवेणं हत्थिरूवेणं एवं वुत्ते समणे अभीए जाव विहरइ, तए
 णं से देवे हत्थिरूवे कामदेवं समणोवासयं अभीयं जाव विहरमाणं पासइ ता दोच्चं पि तच्चं पि कामदेवं समणोवासयं एवं व०-हंभो कामदेवा ! तहेव जाव सोवि विहरइ, तए णं से देवे
 हत्थिरूवे कामदेवं समणोवासयं अभीयं जाव विहरमाणं पासइ ता आसुरुत्ते० कामदेवं समणोवासयं सोण्डाए गेण्हेइ ता उड्ढं वेहासं उव्विहइ ता तिक्खेहिं दंतमुसलेहिं पडिच्छइ
 ता अहेधरणितलंसि तिक्खुत्तो पाएसु लोलेइ, तए णं से कामदेवे समणोवासए तं उज्जलं जाव अहियासेइ । २१ । तए णं से देवे हत्थिरूवे कामदेवं समणोवासयं जाहे नो संचाएइ जाव
 सणियं सणियं पच्चोसकइ ता पोसहसालाओ पडिणिक्खमइ ता दिव्वं हत्थिरूवं विप्पजहइ ता एगं महं दिव्वं सप्परूवं विउव्वइ, उग्गविसं चण्डविसं घोरविसं महाकायं मसीमूसाकालगं
 नयणविसरोसपुण्णं अञ्जणपुञ्जनिगरप्पगासं रत्तच्छं लोहियलोयणं जमलजुयलचञ्चलजीहं धरणीयलवेणिभूयं उक्कडफुडकुडिलजडिलकक्कसवियडफडाडोवकरणदच्छं लोहागरधम्ममा-
 णधमधमेन्तघोसं अणागलियतिव्वचण्डरोसं सप्परूवं विउव्वइ ता जेणेव पोसहसाला जेणेव कामदेवे समणोवासए तेणेव उवागच्छइ ता कामदेवं समणोवासयं एवं व०-हंभो कामदेवा
 समणोवासया ! जाव न भञ्जेसि तो ते अज्जेव अहं सरसरस्स कायं दुरुहामि ता पच्छिमेणं भाएणं तिक्खुत्तो गीवं वेढेमि ता तिक्खाहिं विसपरिगयाहिं दाढाहिं उरंसि चेव निकुट्ठेमि
 जहा णं तुमं अट्ठदुहट्ठवसट्ठे अकाले चेव जीवियाओ ववरोविज्जसि, तए णं से कामदेवे समणोवासए तेणं देवेणं सप्परूवेणं एवं वुत्ते समणे अभीए जाव विहरइ, सोवि दोच्चं पि तच्चं पि
 भणइ कामदेवोवि जाव विहरइ, तए णं से देवे सप्परूवे कामदेवं समणोवासयं अभीयं जाव पासइ ता आसुरुत्ते० कामदेवस्स समणोवासयस्स सरसरस्स कायं दुरुहइ ता पच्छिम-
 भाएणं तिक्खुत्तो गीवं वेढेइ ता तिक्खाहिं विसपरिगयाहिं दाढाहिं उरंसि चेव निकुट्ठेइ, तए णं से कामदेवे समणोवासए तं उज्जल जाव अहियासेइ । २२ । तए णं से देवे सप्परूवे
 कामदेवं समणोवासयं अभीयं जाव पासइ ता जाहे नो संचाएइ कामदेवं समणोवासयं निगन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते० सणियं
 सणियं पच्चोसकइ ता पोसहसालाओ पडिणिक्खमइ ता दिव्वं सप्परूवं विप्पजहइ ता एगं महं दिव्वं देवरूवं विउव्वइ, हारविराइयवच्छं जाव दस दिसाओ उज्जोवेमाणं पभासेमाणं
 पासाईयं दरिसणिज्जं अभिरूवं पडिरूवं दिव्वं देवरूवं विउव्वइ ता कामदेवस्स समणोवासयस्स पोसहसालं अणुप्पविसइ ता अन्तलिक्खपडिवच्चे सखिज्झिणियाइं पञ्चवण्णाइं वत्थाइं
 पवरपरिहिए कामदेवं समणोवासयं एवं व०-हंभो कामदेवा ! समणोवासया धन्ने सि णं तुमं देवाणुप्पिया ! सपुण्णे कयत्थे कयलक्खणे सुलद्धे णं तव देवाणुप्पिया ! माणुस्सए जम्मजी-
 वियफले जस्स णं तव निगन्थे पावयणे इमेयारूवा पडिवत्ती लद्धा पत्ता अभिसमन्नागया, एवं खलु देवाणुप्पिया ! सक्के देविंदे देवराया जाव सक्कसि सीहासणंसि चउरासीईए सामा-
 णियसाहस्सीणं जाव अन्नेसिं च बहूणं देवाण य देवीण य मज्झगए एवमाइक्खइ०-एवं खलु देवाणुप्पिया ! जम्बुदीवे दीवे भारहे वासे चम्पाए नयरीए कामदेवे समणोवासए पोस-
 हसालाए पोसहिए बम्भचारी जाव दम्भसंथारोवगए समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरइ, नो खलु से सक्को केणई देवेण वा जाव गन्धर्वेण वा
 निगन्थाओ पावयणाओ चालित्तए वा खोभित्तए वा विपरिणामित्तए वा, तए णं अहं सक्कस्स देविन्दस्स देवरणो एयमट्ठं असइहमाणे० इहं हव्वमागए तं अहो णं देवाणुप्पिया !
 इड्ढी० लद्धा० तं दिट्ठा णं देवाणुप्पिया ! इड्ढी जाव अभिसमन्नागया, तं खामेमि णं देवाणुप्पिया ! खमंतु मज्झ देवाणुप्पिया ! खन्तुमरहन्ति णं देवाणुप्पिया ! नाइं भुज्जो करण-
 याएत्तिकट्ठु पायवडिए पञ्जलिउडे एयमट्ठं भुज्जो भुज्जो खामेइ ता जामेव दिसं पाउब्भूए तामेव दिसं पडिगए, तए णं से कामदेवे समणोवासए निरुवसग्गमित्तिकट्ठु पडिमं पारेइ,
 तेणं कालेणं० समणे भगवं महावीरे जाव विहरइ । २३ । तए णं से कामदेवे समणोवासए इमीसे कहाए लद्धट्ठे समणे एवं खलु समणे भगवं महावीरे जाव विहरइ तं सेयं खलु मम
 समणं भगवं महावीरं वन्दित्ता नमंसित्ता तओ पडिणियत्तस्स पोसहं पारित्तएत्तिकट्ठु एवं सम्पेहेइ ता सुद्धप्पावेसाइं वत्थाइं जाव अप्पमहग्घ जाव मणुस्सवग्गुरापरिक्खित्ते (१२३)

सयाओ गिहाओ पडिणिक्खमइ ता चम्पं नगरिं मज्झिमज्झेणं निग्गच्छइ ता जेणेव पुण्णभदे चेइए जहा सङ्को जाव पज्जुवासइ, तए णं समणे भगवं महावीरे कामदेवस्स समणो-
 वासयस्स तीसे य जाव धम्मकहा समत्ता । २४ । कामदेवाइ ! समणे भगवं महावीरे कामदेवं समणोवासयं एवं व०-से नूणं कामदेवा ! तुम्हं पुव्वरत्तावरत्तकालसमयंसि एगे देवे
 अन्तिए पाउब्भूए, तए णं से देवे एगं महं दिव्वं पिसायरूवं विउव्वइ ता आसुरुत्ते० एगं महं नीलुप्पल जाव असिं गहाय तुमं एवं वयासी-हंभो कामदेवा ! जाव जीवियाओ ववरो-
 विज्जसि, तं तुमं तेणं देवेणं एवं वुत्ते समणे अभीए जाव विहरसि, एवं वण्णगरहिया तिण्णिवि उवसग्गा तहेव पडिउच्चारयवा जाव देवो पडिगओ, से नूणं कामदेवा ! अट्टे समट्टे ?,
 हन्ता अत्थि, अज्जोइ समणे भगवं महावीरे बहवे समणे निग्गन्थे य निग्गन्थीओ य आमन्तेत्ता एवं व०-जइ ताव अज्जो ! समणोवासगा गिहिणो गिहमज्झावसन्ता दिव्वमाणुस्सति-
 रिक्खजोणिए उवसग्गे सम्मं सहन्ति जाव अहियासेन्ति सक्का पुणाइं अज्जो ! समणेहिं निग्गन्थेहिं दुवालसङ्गं गणिपिडगं अहिज्झमाणेहिं दिव्वमाणुस्सतिरिक्खजोणिए० सम्मं सहि-
 त्तए जाव अहियासित्तए, तओ ते बहवे समणा निग्गन्था य निग्गन्थीओ य समणस्स भगवओ महावीरस्स तहत्ति एयमट्ठं विणएणं पडिसुणन्ति, तए णं से कामदेवे समणोवासए
 हट्ठ जाव समणं भगवं महावीरं पसिणाइं पुच्छइ अट्ठमादियइ समणं भगवं महावीरं तिक्खुत्तो वन्दइ नमंसइ ता जामेव दिसं पाउब्भूए तामेव दिसं पडिगए, तए णं समणे भगवं
 महावीरे अन्नया कयाई चम्पाओ पडिणिक्खमइ ता बहिया जणवयविहारं विहरइ । २५ । तए णं से कामदेवे समणोवासए पढमं उवासगपडिमं उवसम्पज्जित्ताणं विहरइ, तए णं से
 कामदेवे समणोवासए बहूहिं जाव भावेत्ता वीसं वासाइं समणोवासगपरियागं पाउणित्ता एक्कारस उवासगपडिमाओ सम्मं काएणं फासेत्ता० मासियाए संलेहणाए अप्पाणं झूसित्ता
 सट्ठिं भत्ताइं अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मं कप्पे सोहम्मवडिंसयस्स महाविमाणस्स उत्तरपुरत्थिमेणं अरुणाभे विमाणे देवत्ताए
 उववन्ने, तत्थ णं अत्थेगइयाणं देवाणं चत्तारि पलिओवमाइं ठिई पं०, कामदेवस्सवि देवस्स चत्तारि पलिओवमाइं ठिई पं०, से णं भन्ते ! कामदेवे ताओ देवलोगाओ आउक्खएणं
 भवक्खएणं ठिइक्खएणं अणन्तरं चयं चइत्ता कहिं गमिहिइ कहिं उववज्जिहिइ ?, गोयमा ! महाविदेहे वासे सिज्झिहिइ०, निक्खेवो । २६ ॥ कामदेवज्झयणं २ ॥ उक्खेवो तइयस्स अ-
 ज्झयणस्स, एवं खलु जम्बू ! तेणं कालेणं० वाणारसी नामं नयरी, कोट्टए (महाकामवणे पा०) चेइए जियसत्तू राया, तत्थ णं वाणारसीए नयरीए चुल्लणीपिया नामं गाहावई
 परिवसइ अट्टे जाव अपरिभूए सामा भारिया अट्ट हिरण्णकोडीओ निहाणपउत्ताओ अट्ट बुद्धिपउत्ताओ अट्ट पवित्थरपउत्ताओ अट्ट वया दसगोसाहस्सिएणं वएणं, जहा आणन्दो
 राईसर जाव सव्वकज्जवट्ठावए यावि होत्था, सामी समोसठे परिसा निग्गया, चुल्लणीपियावि जहा आणन्दो तहा निग्गओ, तहेव गिहिधम्मं पडिवज्जइ गोयमपुच्छा तहेव सेसं जहा
 कामदेवस्स जाव पोसहसालाए पोसहिए बम्भचारी समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरइ । २७ । तए णं तस्स चुल्लणीपियस्स समणोवासयस्स
 पुव्वरत्तावरत्तकालसमयंसि एगे देवे अन्तियं पाउब्भूए, तए णं से देवे एगं नीलुप्पल जाव असिं गहाय चुल्लणीपियं समणोवासयं एवं व०-हंभो चुल्लणीपिया समणोवासया ! जहा काम-
 देवो जाव न भज्जेसि तो ते अहं अज्ज जेट्ठं पुत्तं साओ गिहाओ नीणेमि ता तव अग्गओ घाएमि ता तओ मंससोहए करेमि ता आदाणभरियंसि कडाहयंसि अदहेमि ता तव गायं
 मंसेण य सोणिएण य आइञ्चामि जहा णं तुमं अट्टदुहट्ठवसट्टे अकाले चेव जीवियाओ ववरोविज्जसि, तए णं से चुल्लणीपिया समणोवासए तेणं देवेणं एवं वुत्ते समणे अभीए जाव
 विहरइ, तए णं से देवे चुल्लणीपियं समणोवासयं अभीयं जाव पासइ ता दोच्चं पि तच्चं पि चुल्लणीपियं समणोवासयं एवं व०-हंभो चुल्लणीपिया ! समणोवासया तं चेव भणइ सो जाव
 विहरइ, तए णं से देवे चुल्लणीपियं समणोवासयं अभीयं जाव पासित्ता आसुरुत्ते० चुल्लणीपियस्स समणोवासयस्स जेट्ठं पुत्तं गिहाओ नीणेइ ता अग्गओ घाएइ ता तओ मंससोहए
 करेइ ता आदाणभरियंसि कडाहयंसि अदहेइ ता चुल्लणीपियस्स समणोवासयस्स गायं मंसेण य सोणिएण य आइञ्चइ, तए णं से चुल्लणीपिया समणोवासए तं उज्जलं जाव अहिया-
 सेइ, तए णं से देवे चुल्लणीपियं समणोवासयं अभीयं जाव पासइ ता दोच्चं पि तच्चं पि चुल्लणीपियं समणोवासयं एवं व०-हंभो चुल्लणीपिया समणोवासया ! अपत्थियपत्थया जाव न
 भज्जेसि तो ते अहं अज्ज मज्झिमं पुत्तं साओ गिहाओ नीणेमि ता तव अग्गओ घाएमि जहा जेट्ठं पुत्तं तहेव भणइ तहेव करेइ एवं तच्चं पि कणीयसं जाव अहियासेइ, तए णं से देवे
 चुल्लणीपियं समणोवासयं अभीयं जाव पासइ ता चउत्थं पि चुल्लणीपियं समणोवासयं एवं व०-हंभो चुल्लणीपिया समणोवासया ! अपत्थियपत्थया जइ णं तुमं जाव न भज्जेसि तओ
 अहं अज्ज जा इमा तव माया भदा सत्थवाही देवयगुरुजणणी दुक्करदुक्करकारिया तं ते साओ गिहाओ नीणेमि ता तव अग्गओ घाएमि ता तओ मंससोहए करेमि ता अदहणभ-
 रियंसि कडाहयंसि अदहेमि ता तव गायं मंसेण य सोणिएण य आइञ्चामि जहा णं तुमं अट्टदुहट्ठवसट्टे अकाले चेव जीवियाओ ववरोविज्जसि, तए णं से चुल्लणीपिया समणोवासए

तेणं देवेणं एवं वुत्ते समाने अभीए जाव विहरइ, तए णं से देवे चुल्लणीपियं समणोवासयं अभीयं जाव विहरमाणं पासइ ता चुल्लणीपियं समणोवासयं दोच्चंपि तच्चंपि एवं व०-हंभो चुल्लणीपिया समणोवासया ! तहेव जाव ववरोविज्जसि, तए णं तस्स चुल्लणीपियस्स समणोवासयस्स तेणं देवेणं दोच्चंपि तच्चंपि एवं वुत्तस्स समानस्स इमेयारूवे अज्झत्थिए० अहो णं इमे पुरिसे अणारिए अणायरियबुद्धी अणायरियाइं पावाइं कम्माइं समायरइ जेणं मम जेट्ठं पुत्तं साओ गिहाओ नीणेइ ता मम अग्गओ घाएइ ता जहा कयं तहा चिन्तेइ जाव गायं आइअइ जेणं मम मज्झिमं पुत्तं साओ गिहाओ जाव सोणिएण य आइअइ जेणं मम कणीयसं पुत्तं साओ गिहाओ तहेव जाव आइअइ, जाविय णं इमा मम माया भदा सत्थ-वाही देवयगुरुजणणी दुक्करदुक्करकारिया तंपिय णं इच्छइ साओ गिहाओ नीणेत्ता मम अग्गओ घाएत्तए तं सेयं खलु मम एयं पुरिसं गिण्हित्तएत्तिकट्टु उद्धाइए सेऽविय आगासे उप्पइए तेणं च खम्भे आसाइए महया महया सदेणं कोलाहले कए. तए णं सा भदा सत्थवाही तं कोलाहलसदं सोच्चा निसम्म जेणेव चुल्लणीपिया समणोवासए तेणेव उवागच्छइ ता चुल्लणीपियं समणोवासयं एवं व०-किण्णं पुत्ता ! तुमं महया महया सदेणं कोलाहले कए ?, तए णं से चुल्लणीपिया समणोवासए अम्मयं भदं सत्थवाहिं एव व०-एवं खलु अम्मो ! न जानामि केवि पुरिसे आसुरुत्ते० एगं महं नीलुप्पल० असिं गहाय मम एवं व०-हंभो चुल्लणीपिया समणोवासया ! अपत्थियपत्थया० वज्जिया जइ णं तुमं जाव ववरोविज्जसि तए णं अहं तेणं पुरिसेणं एवं वुत्ते समाने अभीए जाव विहरामि, तए णं से पुरिसे मम अभीयं जाव विहरमाणं पासइ ता मम दोच्चंपि तच्चंपि एवं व०-हंभो चुल्लणीपिया समणोवासया ! तहेव जाव गायं आयअइ, तए णं अहं तं उज्जलं जाव अहियासेमि, एवं तहेव उच्चारेयवं सवं जाव कणीयसं जाव आयअइ अहं तं उज्जलं जाव अहियासेमि, तए णं से पुरिसे मम अभीयं जाव पासइ ता मम चउत्थंपि एवं व०-हंभो चुल्लणीपिया समणोवासया ! अपत्थियपत्थया जाव न भज्जसि तो ते अज्ज जा इमा माया गुरु जाव ववरोविज्जसि, तए णं अहं तेणं पुरिसेणं एवं वुत्ते समाने अभीए जाव विहरामि, तए णं से पुरिसे दोच्चंपि तच्चंपि मम एवं व०-हंभो चुल्लणीपिया समणोवासया ! अज्ज जाव ववरोविज्जसि, तए णं तेणं पुरिसेणं दोच्चंपि तच्चंपि मम एवं वुत्तस्स समानस्स इमेयारूवे अज्झत्थिए०-अहो णं इमे पुरिसे अणारिए जाव समायरइ जेणं मम जेट्ठं पुत्तं साओ गिहाओ तहेव जाव कणीयसं जाव आयअइ तुम्भेवि य णं इच्छइ साओ गिहाओ नीणेत्ता मम अग्गओ घाइत्तए तं सेयं खलु मम एयं पुरिसं गिण्हित्तएत्तिकट्टु उद्धाइए, सेविय आगासे उप्पइए. मएविय खम्भे आसाइए महया महया सदेणं कोलाहले कए. तए णं सा भदा सत्थवाही चुल्लणीपियं समणोवासयं एवं व०-नो खलु केई पुरिसे तव जाव कणीयसं पुत्तं साओ गिहाओ नीणेइ ता तव अग्गओ घाएइ एस णं केई पुरिसे तव उवसग्गं करेइ एस णं तुमे विदरिसणे दिट्ठे तं णं तुमं इयाणिं भग्गवए भग्गनियमे भग्गपोसहे विहरसि तं णं तुमं पुत्ता ! एयस्स ठाणस्स आलोएहि जाव पडिवज्जाहि, तए णं से चुल्लणीपिया समणोवासए अम्मगाए भदाए सत्थवाहीए तहत्ति एयमट्ठं विणएणं पडिसुणेइ ता तस्स ठाणस्स आलोएइ जाव पडिवज्जइ । २८ । तए णं से चुल्लणीपिया समणोवासए पढमं उवासगपडिमं उवसम्पज्जित्ताणं विहरइ, पढमं उवासगपडिमं अहासुत्तं जहा आणन्दो जाव एक्कारसवि. तए णं से चुल्लणीपिया समणोवासए तेणं उरालेणं जहा कामदेवो जाव सोहम्मे कप्पे सोहम्मवडिंसगस्स महाविमाणस्स उत्तरपुरच्छिमेणं अरुणप्पभे विमाणे देवत्ताए उववच्चे चत्तारि पलिओवमाइं ठिई पं० महाविदेहे वासे सिज्झिहिइ०, निक्खेवो । २९ ॥ चुल्लणीपियज्झयणं ३ ॥ उक्खेवओ चउत्थस्स अज्झयणस्स, एवं खलु जंबू ! तेणं कालेणं० वाणारसी नामं नयरी कोट्टए (काममहावणे पा०) चेइए जियसत्तू राया सुरादेवे गाहावई अट्ठे० ल हिरण्णकोडीओ जाव ल वया दसगोसाहस्सिएणं वएणं धन्ना भारिया सामी समोसडे जहा आणन्दो तहेव पडिवज्जइ गिहिधम्मं. जहा कामदेवो जाव समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरइ । ३० । तए णं तस्स सुरादेवस्स समणोवासयस्स पुब्बरत्तावरत्तकालसमयंसि एगे देवे अन्तियं पाउब्भ-वित्था से देवे एगं महं नीलुप्पल जाव असिं गहाय सुरादेवं समणोवासयं एवं व०-हंभो सुरादेवा समणोवासया ! अपत्थियपत्थया० जइ णं तुमं सीलाइं जाव न भज्जसि तो ते जेट्ठं पुत्तं साओ गिहाओ नीणेमि ता तव अग्गओ घाएमि ता पञ्च मंससोल्लए करेमि ता आदाणभरियंसि कडाहयंसि अइहेमि ता तव गायं मंसेण य सोणिएण य आयअमि जहा णं तुमं अकाले चेव जीवियाओ ववरोविज्जसि एवं मज्झिमयं कणीयसं एक्केके पञ्च सोल्लया, तहेव करेइ जहा चुल्लणीपियस्स नवरं एक्केके पञ्च सोल्लया, तए णं से देवे सुरादेवं समणोवासयं चउत्थंपि एवं व०-हंभो सुरादेवा समणोवासया ! अपत्थियपत्थया जाव न परिच्चयसि तो ते अज्ज सरिंसि जमगसमगमेव सोल्लस रोगायङ्गे पक्खिवामि तं०-‘सासे कासे जाव कोटे’ जहा णं तुमं अट्ठदुहट्ट जाव ववरोविज्जसि, तए णं से सुरादेवे समणोवासए जाव विहरइ एवं देवो दोच्चंपि तच्चंपि भणइ जाव ववरोविज्जसि, तए णं तस्स सुरादेवस्स समणोवासयस्स तेणं देवेणं दोच्चंपि तच्चंपि एवं वुत्तस्स समानस्स इमेयारूवे अज्झत्थिए० अहो णं इमे पुरिसे अणारिए जाव समायरइ जेणं मम जेट्ठं पुत्तं जाव कणीयसं जाव आयअइ जेविय

इमे सोलस रोगायङ्गा तेवि य इच्छइ मम सरीरगंसि पक्खिवित्तए तं सेयं खलु ममं एयं पुरिसं गिण्हित्तएत्तिकट्टु उद्धाइए सेवि य आगासे उप्पइए तेण य खम्भे आसाइए महया महया सदेणं कोलाहले कए. तए णं सा धन्ना भारिया कोलाहल सोच्चा निसम्म जेणेव सुरादेवे समणोवासए तेणेव उवागच्छइ ता एवं व०-किण्णं देवाणुप्पिया ! तुब्भेहिं महया महया सदेणं कोलाहले कए ? तए णं से सुरादेवे समणोवासए धन्ना भारियं एवं व०-एवं खलु देवाणुप्पिए ! केवि पुरिसे तहेव कहेइ जहा चुट्टणीपिया धन्नावि पडिभणइ जाव कणीयसं नो खलु देवाणुप्पिया ! तुब्भं केवि पुरिसे सरीरसि जमगसमगं सोलस रोगायङ्गे पक्खिवइ एस णं केवि पुरिसे तुब्भं उवसग्गं करेइ सेसं जहा चुट्टणीपियस्स भद्दा भणइ एवं निरवसेसं जाव सोहम्मे कप्पे अरुणकन्ते विमाणे उववन्ने चत्तारि पलिओवमाइं ठिई महाविदेहे वासे सिज्झिहिइ० । निक्खेवो । ३१ ॥ सुरादेवज्झयणं ४ ॥ उक्खेवो पञ्चमस्स । एवं खलु जम्बू ! तेणं कालेणं० आलंभिया नामं नयरी सङ्गवणे उज्जाणे जियसत्तू राया चुट्टसयए गाहावई अइडे जाव छ हिरण्णकोडीओ जाव छब्बया दसगोसाहस्सिएणं वएणं बहुला भारिया सामी समोसडे जहा आणन्दो तहा गिहिधम्मं पडिवज्जइ सेसं जहा कामदेवो जाव धम्मपण्णत्तिं उवसम्पज्जित्ताणं विहरइ । ३२ । तए णं तस्स चुट्टसयगस्स समणोवासयस्स पुत्ररत्तावर-त्तकालसमयंसि एगे देवे अन्तियं जाव असिं गहाय एवं व०-हंभो चुट्टसयगा समणोवासया ! जाव न भञ्जसि तो ते अज्ज जेट्ठं पुत्तं साओ गिहाओ नीणेमि एवं जहा चुट्टणीपियं नवरं एकेके सत्त मंससोल्लया जाव कणीयसं आयञ्चामि, तए णं से चुट्टसयए समणोवासए जाव विहरइ, तए णं से देवे चुट्टसयगं समणोवासयं चउत्थंपि एवं व०-हंभो चुट्टसयगा समणो-वासया ! जाव न भञ्जसि तो ते अज्ज जाओ इमाओ छ हिरण्णकोडीओ निहाणपउत्ताओ छ बुद्धिपउत्ताओ छ पवित्थरपउत्ताओ ताओ साओ गिहाओ नीणेमि ता आलंभियाए नयरीए सिङ्गाडगजावपहेसु सव्वओ समन्ता विप्पइरामि जहा णं तुमं अट्टुहट्टवसट्टे अकाले चेव जीवियाओ ववरोविज्जसि, तए णं से चुट्टसयए समणोवासए तेणं देवेणं एवं वुत्ते समाणे अभीए जाव विहरइ, तए णं से देवे चुट्टसयगं समणोवासयं अभीयं जाव पासित्ता दोच्चंपि तच्चंपि तहेव भणइ जाव ववरोविज्जसि, तए णं तस्स चुट्टसयगस्स समणोवासयस्स तेणं देवेणं दोच्चंपि तच्चंपि एवं वुत्तस्स समाणस्स अयमेयारूवे अज्झत्थिए० अहो णं इमे पुरिसे अणारिए जहा चुट्टणीपिया तहा चिन्तइ जाव कणीयसं जाव आइञ्चइ जाओवि य णं इमाओ ममं छ हिरण्णकोडीओ निहाणपउत्ताओ छ बुद्धिपउत्ताओ छ पवित्थरपउत्ताओ ताओवि य णं इच्छइ मम साओ गिहाओ नीणेत्ता आलंभियाए नयरीए सिङ्गाडग जाव विप्पइ-रित्तए तं सेयं खलु ममं एयं पुरिसं गिण्हित्तएत्तिकट्टु उद्धाइए जहा सुरादेवो तहेव भारिया पुच्छइ तहेव कहेइ । ३३ । सेसं जहा चुट्टणीपियस्स जाव सोहम्मे कप्पे अरुणसिट्टे विमाणे उववन्ने चत्तारि पलिओवमाइं ठिई सेसं तहेव जाव महाविदेहे वासे सिज्झिहिइ० निक्खेवो । ३४ ॥ चुट्टसयगज्झयणं ५ ॥ छट्टस्स उक्खेवओ । एवं खलु जम्बू ! तेणं कालेणं० कम्पिहपुरे नयरे (प्र० पुढवीसिलापट्टए चेइए) सहस्सम्भवणे उज्जाणे जियसत्तू राया कुण्डकोलिए गाहावई पूसा भारिया छ हिरण्णकोडीओ निहाणपउत्ताओ छ बुद्धिपउत्ताओ छ पवि० छब्बया दसगोसाहस्सिएणं वएणं सामी समोसडे जहा कामदेवो तहा सावयधम्मं पडिवज्जइ सच्चेव वत्तवया जाव पडिलाभेमाणी विहरइ । ३५ । तए णं से कुण्डकोलिए समणोवासए अन्नया कयाई पुद्वावरण्हकालसमयंसि जेणेव असोगवणिया जेणेव पुढवीसिलापट्टए तेणेव उवागच्छइ ता नाममुद्दगं च उत्तरिज्जगं च पुढवीसिलापट्टए ठवेइ ता समणस्स भगवओ महावीरस्स अन्तियं धम्मपण्णत्तिं उवसम्पज्जित्ताणं विहरइ, तए णं तस्स कुण्डकोलियस्स समणोवासयस्स एगे देवे अन्तियं पाउब्भवित्था, तए णं से देवे नाममुद्दं च उत्तरिज्जं च पुढवीसिलापट्ट-याओ गेण्हइ ता सखिद्धिखणिं अन्तलिक्खपडिवन्ने कुण्डकोलियं समणोवासयं एवं व०-हंभो कुण्डकोलिया समणोवासया ! सुन्दरी णं देवाणुप्पिया ! गोसालस्स मङ्खलिपुत्तस्स धम्म-पण्णत्ती नत्थि उट्टाणेइ वा कम्मेइ वा बलेइ वा वीरिएइ वा पुरिसक्कारपरक्कमेइ वा नियया सव्वभावा, मंगुली णं समणस्स भगवओ महावीरस्स धम्मपण्णत्ती अत्थि उट्टाणेइ वा जाव परक्कमेइ वा अणियया सव्वभावा, तए णं से कुण्डकोलिए समणोवासए तं देवं एवं व०-जइ णं देवा ! सुन्दरी गोसालस्स मङ्खलिपुत्तस्स धम्मपण्णत्ती नत्थि उट्टाणेइ वा जाव नियया सव्वभावा, मंगुली णं समणस्स भगवओ महावीरस्स धम्मपण्णत्ती अत्थि उट्टाणेइ वा जाव अणियया सव्वभावा, तुमे णं देवाणुप्पिया ! इमा एयारूवा दिव्वा देविड्ढी दिव्वा देवज्जुई दिव्वे देवाणुभावे किण्णा लद्धे किंणा पत्ते किंणा अभिसमण्णागए किं उट्टाणेणं जाव पुरिसक्कारपरक्कमेणं उदाहु अणुट्टाणेणं अकम्मेणं जाव अपुरिसक्कारपरक्कमेणं ? तए णं से देवे कुण्डकोलियं समणोवासयं एवं व०-एवं खलु देवाणुप्पिया ! मए इमेयारूवा दिव्वा देविड्ढी० अणुट्टाणेणं जाव अपुरिसक्कारपरक्कमेणं लद्धा पत्ता अभिसमन्नागया, तए णं से कुण्डको-लिए समणोवासए तं देवं एवं व०-जइ णं देवा ! तुमे इमा एयारूवा दिव्वा देविड्ढी० अणुट्टाणेणं जाव अपुरिसक्कारपरक्कमेणं लद्धा पत्ता अभिसमन्नागया जेसिं णं जीवाणं नत्थि उट्टा-णेइ वा जाव परक्कमेइ वा ते किं न देवा ? अह णं देवा ! तुमे एयारूवा दिव्वा देविड्ढी० उट्टाणेणं जाव परक्कमेणं लद्धा पत्ता अभिसमन्नागया तो जं वदसि सुन्दरी णं गोसालस्स मङ्ख-

लिपुत्तस्स धम्मपण्णत्ती नत्थि उट्ठाणेइ वा जाव नियया सब्भावा मंगुली णं समणस्स भगवओ महावीरस्स धम्मपण्णत्ती अत्थि उट्ठाणेइ वा जाव अणियया सब्भावा तं ते मिच्छा, तए णं से देवे कुण्डकोलिएणं एवं वुत्ते समाणे सङ्गिए जाव कलुससमावन्ने नो संचाएइ कुण्डकोलियस्स समणोवासयस्स किंचि पामोक्खमाइक्खित्तए नाममुदयं च उत्तरिज्जयं च पुढवीसिलापट्टए ठवेइ ता जामेव दिसं पाउब्भूए तामेव दिसं पडिगए । तेणं कालेणं० सामी समोसटे, तए णं से कुण्डकोलिए समणोवासए इमीसे कहाए लद्धट्टे हट्ट जहा कामदेवो तहा निग्गच्छइ जाव पज्जुवासइ, धम्मकहा । ३६ । कुण्डकोलियाइ ! समणे भगवं महावीरे कुण्डकोलियं समणोवासयं एवं व०-से नूणं कुण्डकोलिया ! कल्लं तुब्भ पुब्बा(प्र० पच्चा) - वरण्हकालसमयंसि असोगवणियाए एगे देवे अन्तियं पाउब्भवित्था, तए णं से देवे नाममुदं च तहेव जाव पडिगए से नूणं कुण्डकोलिया ! अट्टे समट्टे ?, हन्ता अत्थि, तं धन्ने सि णं तुमं कुण्डकोलिया ! जहा कामदेवो अज्जोइ ! समणे भगवं महावीरे समणे निग्गन्थे य निग्गन्थीओ य आमन्तेति ता एवं व०-जइ ताव अज्जो ! गिहिणो गिहिमज्झा(प्र० ज्झ)वसन्ता अन्नउत्थिए अट्टेहि य हेऊहि य पसिणेहि य कारणेहि य वागरणेहि य निप्पट्टपसिणवागरणे करेन्ति सक्का पुणाइ अज्जो ! समणेहिं निग्गन्थेहिं दुवालसङ्गं गणिपिडगं अहिज्जमाणेहिं अन्नउत्थिया अट्टेहि य जाव निप्पट्टपसिणवागरणा करित्तए. तए णं समणा निग्गन्था य निग्गन्थीओ य समणस्स भगवओ महावीरस्स तहत्ति एयमट्टं विणएणं पडिसुणन्ति, तए णं से कुण्डकोलिए समणोवासए समणं भगवं महावीरं वन्दइ नमंसइ ता पसिणाइं पुच्छइ ता अट्टमादियइ ता जामेव दिसं पाउब्भूए तामेव दिसं पडिगए, सामी बहिया जणवयविहारं विहरइ । ३७ । तए णं तस्स कुण्डकोलियस्स समणोवासयस्स बहूहिं सील जाव भावेमाणस्स चोदसं संवच्छराइं वडक्कन्ताइं पणरसमस्स संवच्छरस्स अन्तरा वट्टमाणस्स अन्नया कयाई जहा कामदेवो तहा जेट्टपुत्तं ठवेत्ता तहा पोसहसालाए जाव धम्मपण्णत्तिं उवसम्पज्जित्ताणं विहरइ, एवं एक्कारस उवासगपडिमाओ तहेव जाव सोहम्मे कप्पे अरुणज्झए विमाणे जाव अन्तं काहिइ. निक्खेवो । ३८ ॥ कुण्डकोलियज्झयणं ६ ॥ सत्तमस्स उक्खेवो. पोलासपुरे नामं नयरे सहस्सम्बवणे उज्जाणे जियसत्तू राया, तत्थ णं पोलासपुरे नयरे सद्दालपुत्ते नामं कुम्भकारे आजीविओवासए परिवसइ आजीवियसमयंसि लद्धधट्टे गहियट्टे पुच्छियट्टे विणिच्छियट्टे अभिगयट्टे अट्टिमिजपेम्माणुरागरत्ते य अयमाउसो ! आजीवियसमए अट्टे अयं परमट्टे सेसे अणट्टेत्ति आजीवियसमएणं अप्पाणं भावेमाणे विहरइ, तस्स णं सद्दालपुत्तस्स आजीविओवासगस्स एक्का हिरण्णकोडी निहाणपउत्ता एक्का वुड्ढिपउत्ता एक्का पवित्थरपउत्ता एक्के वए दसगोसाहस्सिएणं वएणं. तस्स णं सद्दालपुत्तस्स आजीविओवासगस्स अग्गिमित्ता नामं भारिया होत्था, तस्स णं सद्दालपुत्तस्स आजीविओवासगस्स पोलासपुरस्स नगरस्स बहिया पञ्च कुम्भकारावणसया होत्था. तत्थ णं बहवे पुरिसा दिण्णभइभत्तवेयणा कल्लाकल्लिं बहवे करए य वारए य पिहडए य घडए य अद्धघडए य कलसए य अलिञ्जरए य जम्बूलए य उट्टियाओ य करेन्ति अन्ने य से बहवे पुरिसा दिण्णभइभत्तवेयणा कल्लाकल्लिं तेहिं बहूहिं करएहि य जाव उट्टियाहि य रायमग्गंसि वित्तिं कप्पेमाणा विहरन्ति । ३९ । तए णं से सद्दालपुत्ते आजीविओवासए अन्नया कयाई पुब्बा(प्र० पच्चा)वरण्हकालसमयंसि जेणेव असोगवणिया तेणेव उवागच्छइ ता गोसालस्स मज्जलिपुत्तस्स अन्तियं धम्मपण्णत्तिं उवसम्पज्जित्ताणं विहरइ, तए णं तस्स सद्दालपुत्तस्स आजीविओवासगस्स एगे देवे अन्तियं पाउब्भवित्था. तए णं से देवे अन्तलिक्खपडिवन्ने सखिज्झिणियाइं जाव परिहिए सद्दालपुत्तं आजीविओ-वासयं एवं व०-एहिइ णं देवाणुप्पिया ! कल्लं इहं महामाहणे उप्पन्नणाणदंसणधरे तीयपट्टुप्पन्नाणागयजाणए अरहा जिणे केवली सब्बणू सब्बदरिसी तेलोक्कवहियमहियपूइए सदेवमणुया-सुरस्स लोगस्स अन्नणिज्जे वन्दणिज्जे पूयणिज्जे सक्कारणिज्जे सम्माणणिज्जे कल्लाणं मज्जलं देवयं चेइयं जाव पज्जुवासणिज्जे तच्चकम्मसम्पयासंपउत्ते तं णं तुमं वन्देज्जाहि जाव पज्जुवासे-ज्जाहि पाडिहारिएणं पीढफलगसिज्जासंथारएणं उवनिमन्तेज्जाहि दोच्चं पि तच्चं पि एवं वयइ ता जामेव दिसं पाउब्भूए तामेव दिसं पडिगए. तए णं तस्स सद्दालपुत्तस्स आजीविओवास-गस्स तेणं देवेणं एवं वुत्तस्स समाणस्स इमेयारूवे अज्झत्थिए० समुप्पन्ने-एवं खलु ममं धम्मायरिए धम्मोवएसए गोसाले मड्खलिपुत्ते से णं महामाहणे उप्पन्नणाणदंसणधरे जाव तच्चकम्मसम्पयासम्पउत्ते से णं कल्लं इहं हव्वमागच्छिस्सइ तए णं तं अहं वन्दिस्सामि जाव पज्जुवासिस्सामि पाडिहारिएणं जाव उवनिमन्तिस्सामि । ४० । तए णं कल्लं जाव जलन्ते समणे भगवं महावीरे जाव समोसरिए परिसा निग्गया जाव पज्जुवासइ, तए णं से सद्दालपुत्ते आजीविओवासए इमीसे कहाए लद्धट्टे समाणे एवं खलु समणे भगवं महावीरे जाव विहरइ तं गच्छामि णं समणं भगवं महावीरं वन्दामि जाव पज्जुवासामि एवं सम्पेहेइ ता ण्हाए जाव पायच्छित्ते सुदुप्पावेसाइं जाव अप्पमहग्गघाभरणात्तुङ्गियसरीरे मणुस्सवग्गुराप-रिगए साओ गिहाओ पडिणिक्खमइ ता पोलासपुरं नयरं मज्झंमज्झेणं निग्गच्छइ ता जेणेव सहस्सम्बवणे उज्जाणे जेणेव समणे भगवं महावीरे तेणेव उवागच्छइ ता तिकखुत्तो आया-हिणं पयाहिणं करेइ ता वन्दइ नमंसइ ता जाव पज्जुवासइ, तए णं समणे भगवं महावीरे सद्दालपुत्तस्स आजीविओवासगस्स तीसे य महइ जाव धम्मकहा समत्ता, सद्दालपुत्ताइ ! समणे भगवं महावीरे सद्दालपुत्तं आजीविओवासयं एवं व०-से नूणं सद्दालपुत्ता ! कल्लं तुमं पुब्बावरण्हकालसमयंसि जेणेव असोगवणिया जाव विहरसि तए णं तुब्भं एगे देवे अन्तियं (१२४)

पाउम्भवित्था, तए णं से देवे अन्तलिकखपडिवन्ने एवं व०-हंभो सद्दालपुत्ता ! तं चेव सव्वं जाव पज्जुवासिस्सामि से नूणं सद्दालपुत्ता ! अट्ठे समट्ठे ?, हंता अत्थि, नो खलु सद्दालपुत्ता ! तेणं देवेणं गोसालं मइखलिपुत्तं पणिहाय एवं वुत्तं, तए णं तस्स सद्दालपुत्तस्स आजीविओवासयस्स समणेणं भगवया महावीरेणं एवं वुत्तस्स समाणस्स इमेयारूवे अज्झत्थिए० एस णं समणे भगवं महावीरे महामाहणे उप्पन्नणाणदंसणधरे जाव तच्चकम्मसम्पयासम्पउत्ते तं सेयं खलु मम समणं भगवं महावीरं वन्दित्ता नमंसित्ता पाडिहारिएणं पीढफलग जाव उवनिमन्तित्तए एवं सम्पेहेइ त्ता उट्ठाए उट्ठेइ त्ता समणं भगवं महावीरं वन्दइ नमंसइ त्ता एवं व०-एवं खलु भन्ते ! मम पोलासपुरस्स नयरस्स बहिया पञ्च कुम्भकारावणसया तत्थ णं तुब्भे पाडिहारियं पीढजावसंथारयं ओगिण्हित्ताणं विहरह, तए णं समणे भगवं महावीरे सद्दालपुत्तस्स आजीविओवासगस्स एयमट्ठं पडिसुणेइ त्ता सद्दालपुत्तस्स आजीविओवास-गस्स पञ्चकुम्भकारावणएसु फामुएसणिज्जं पाडिहारियं पीढफलगजावसंथारयं ओगिण्हित्ताणं विहरइ । ४१ । तए णं से सद्दालपुत्ते आजीविओवासए अन्नया कयाई वायाहययं० को-लालभण्डं अन्तो सालाहितो बहिया नीणेइ त्ता आयवंसि दलयइ, तए णं समणे भगवं महावीरे सद्दालपुत्तं आजीविओवासयं एवं व०-सद्दालपुत्ता ! एस णं कोलालभण्डे कओ ?, तए णं से सद्दालपुत्ते आजीविओवासए समणं भगवं महावीरं एवं व०-एस णं भंते ! पुंविं मट्ठिया आसी तओ पच्छा उदएणं निमिज्जइ त्ता लारेण य करिसेण य एगओ मीसिज्जइ त्ता चक्के आरोहिज्जइ तओ बहवे करगा य जाव उट्ठियाओ य कज्जन्ति, तए णं समणे भगवं महावीरे सद्दालपुत्तं आजीविओवासयं एवं व०-सद्दालपुत्ता ! एस णं कोलालभण्डे किं उट्ठाणेणं जाव पुरिसक्कारपरक्कमेणं कज्जंति उदाहु अणुट्ठाणेणं जाव अपुरिसक्कारपरक्कमेणं कज्जंति ? तए णं से सद्दालपुत्ते आजीविओवासए समणं भगवं महावीरं एवं व०-भन्ते ! अणुट्ठाणेणं जाव अपुरिसक्कारपरक्कमेणं नत्थि उट्ठाणेइ वा जाव परक्कमेइ वा नियया सव्वभावा, तए णं समणे भगवं महावीरे सद्दालपुत्तं आजीविओवासयं एवं व०-सद्दालपुत्ता ! जइ णं तुब्भं केई पुरिसे वायाहयं वा पक्केल्लयं वा कोलालभण्डं अवहरेज्जा वा विक्खिरेज्जा वा भिन्देज्जा वा अ(वि पा०)च्छिन्देज्जा वा परिट्ठवेज्जा वा अग्गिमित्ताए भारियाए वा सद्धिं विउलाइं भोगभोगाइं भुञ्ज-माणे विहरेज्जा तस्स णं तुमं पुरिसस्स किं दण्डं वत्तेज्जासि ?, भन्ते ! अहं णं तं पुरिसं आओसेज्जा वा हणेज्जा वा बंधेज्जा वा महेज्जा वा तजेज्जा वा तालेज्जा वा निच्छोडेज्जा वा निब्भ-च्छेज्जा वा अकाले चेव जीवियाओ ववरोवेज्जा वा, सद्दालपुत्ता ! नो खलु तुब्भं केई पुरिसे वायाहयं वा पक्केल्लयं वा कोलालभण्डं अवहरइ वा जाव परिट्ठवेइ वा अग्गिमित्ताए वा भारियाए सद्धिं विउलाइं भोगभोगाइं भुञ्जमाणे विहरइ नो वा तुमं तं पुरिसं आओसेज्जसि वा हणेज्जसि वा जाव अकाले चेव जीवियाओ ववरोवेज्जसि जइ नत्थि उट्ठाणेइ वा जाव परक्कमेइ वा नियया सव्वभावा, अहं णं तुब्भं केई पुरिसे वायाहयं जाव परिट्ठवेइ तुमं वा तं पुरिसं आओसेसि वा जाव ववरोवेसि वा तो जं वदसि नत्थि उट्ठाणेइ वा जाव नियया सव्वभावा तं ते मिच्छा एत्थ णं से सद्दालपुत्ते आजीविओवासए सम्बुद्धे, तए णं से सद्दालपुत्ते आजीविओवासए समणं भगवं महावीरं वन्दइ नमंसइ त्ता एवं व०-इच्छामि णं भन्ते ! तुब्भं अन्तिए धम्मं निसामेत्तए, तए णं समणे भगवं महावीरे सद्दालपुत्तस्स आजीविओवासगस्स तीसे य जाव धम्मं पडिकहेइ । ४२ । तए णं से सद्दालपुत्ते आजीविओवासए समणस्स भगवओ महा-वीरस्स अन्तिए धम्मं सोच्चा निसम्म हट्ठुट्ठजावहियए जहा आणन्दो तहा गिहिधम्मं पडिवज्जइ नवरं एगा हिरण्णकोडी निहाणपउत्ता एगा हिरण्णकोडी बुद्धिपउत्ता एगा हिरण्ण-कोडी पवित्थरपउत्ता एगे वए दसगोसाहस्सिएणं वएणं जाव समणं भगवं महावीरं वन्दइ नमंसइ त्ता जेणेव पोलासपुरे नयरे तेणेव उवागच्छइ त्ता पोलासपुरं नयरं मज्झंमज्झेणं जेणेव सए गिहे जेणेव अग्गिमित्ता भारिया तेणेव उवागच्छइ त्ता अग्गिमित्तं भारियं एवं व०-एवं खलु देवाणुप्पिए ! समणे भगवं महावीरे जाव समोसढे तं गच्छाहि णं तुमं समणं भगवं महावीरं वन्दाहि जाव पज्जुवासाहि समणस्स भगवओ महावीरस्स अन्तिए पञ्चाणुव्वइयं सत्तसिक्खावइयं दुवालसविहं गिहिधम्मं पडिवज्जाहि, तए णं सा अग्गिमित्ता भारिया सद्दालपुत्तस्स समणोवासगस्स तहत्ति एयमट्ठं विणएणं पडिसुणेइ, तए णं से सद्दालपुत्ते समणोवासए कोडुंबियपुरिसे सद्दावेइ त्ता एवं व०-खिप्पामेव भो देवाणुप्पिया ! लहुकरणजुत्त-जोइयं समखुरवालिहाणसमलिहियसिद्धएहिं जम्बूणयामयकलावजोत्तपडिविसिट्ठएहिं रययामयघण्टसुत्तरजुगवरकञ्चणखइयनत्थापग्गहोग्गहियएहिं नीलुप्पलकयामेलएहिं पवरगोण-जुवाणएहिं नाणामणिकणगघण्टियाजालपरिगयं सुजायजुगजुत्तउज्जुगपसत्थसुविरइयनिम्मियं पवरलक्खणोववेयं जुत्तामेव धम्मियं जाणप्पवरं उवट्ठवेह त्ता मम एयमाणत्तियं पच्च-प्पिणह, तए णं ते कोडुंबियपुरिसा जाव पच्चप्पिणन्ति, तए णं सा अग्गिमित्ता भारिया ण्हाया जाव पायच्छित्ता सुद्धप्पावेसाइं जाव अप्पमहग्घाभरणाळङ्कियसरीरा चेडियाचक्कवालप-रिकिण्णा धम्मियं जाणप्पवरं दुरुहइ त्ता पोलासपुरं नगरं मज्झंमज्झेणं निग्गच्छइ त्ता जेणेव सहस्सम्बवणे उज्जाणं धम्मियाओ जाणाओ पच्चोरुहइ त्ता जेणेव समणे० तेणेव उवाग-च्छइ त्ता चेडियाचक्कवालपरिवुडा जेणेव समणे भगवं महावीरे तेणेव उवागच्छइ त्ता तिक्खुत्तो जाव वन्दइ नमंसइ त्ता नच्चासन्ने नाइदूरे जाव पञ्जलिउडा ठिइया चेव पज्जुवासइ,

४९७ उपासकदशांगं, - अज्झयपा - ७

तए णं समणे भगवं महावीरे अग्गिमित्ताए तीसे य जाव धम्मं कहेइ, तए णं सा अग्गिमित्ता भारिया समणस्स भगवओ महावीरस्स अन्तिए धम्मं सोच्चा निसम्म हट्ठतुट्ठा समणं भगवं महावीरं वन्दइ नमंसइ ता एवं व०-सदहामि णं भन्ते ! निग्गन्थं पावयणं जाव से जहेयं तुब्भे वयह जहा णं देवाणुप्पियाणं अन्तिए बहवे उग्गा भोगा जाव पव्वइया नो खलु अहं संचाएमि देवाणुप्पियाणं अन्तिए मुण्डा भवित्ता जाव अहणं देवाणुप्पियाणं अन्तिए पञ्चाणुव्वइयं सत्तसिक्खावइयं दुवालसविहं गिहिधम्मं पडिवज्जामि, अहासुहं देवाणुप्पिया ! मा पडिवन्धं करेह, तए णं सा अग्गिमित्ता भारिया समणस्स भगवओ महावीरस्स अन्तिए पञ्चाणुव्वइयं सत्तसिक्खावइयं दुवालसविहं सावग्गधम्मं पडिवज्जइ ता समणं भगवं महावीरं वन्दइ नमंसइ ता तमेव धम्मियं जाणप्पवरं दुरुहइ ता जामेव दिसं पाउब्भूया तामेव दिसं पडिगया, तए णं समणे भगवं महावीरे अन्नया कयाई पोलासपुराओ नयराओ सहस्सम्बवणाओ० पडिनिग्गच्छइ (प्र० पडिनिक्खमइ) ता बहिया जणवयविहारं विहरइ । ४३ । तए णं से सद्दालपुत्ते समणोवासए जाए अभिगयजीवाजीवे जाव विहरइ, तए णं से गोसाले मइखलिपुत्ते इमीसे कहाए लद्धट्ठे समाणे० एवं खलु सद्दालपुत्ते आजीवियसमयं वमित्ता समणाणं निग्गन्थाणं दिट्ठिं पडिवन्ने तं गच्छामि णं सद्दालपुत्तं आजीविओवासयं समणाणं निग्गन्थाणं दिट्ठिं वामेत्ता पुणरवि आजीवियदिट्ठिं गेण्हावित्तएत्तिकट्ठु एवं सम्पेहेइ ता आजीवियसङ्गसम्परिवुडे जेणेव पोलासपुरे नयरे जेणेव आजीवियसभा तेणेव उवागच्छइ ता आजीवियसभाए भण्डगनिकखेवं करेइ ता कइवएहिं आजीविएहिं सद्धिं जेणेव सद्दालपुत्ते समणोवासए तेणेव उवागच्छइ, तए णं से सद्दालपुत्ते समणोवासए गोसालं मइखलिपुत्तं एज्जमाणं पासइ ता नो आढाइ नो परिजाणइ अणाढायमाणे अपरियाणमाणे तुसिणीए संचिद्धइ, तए णं से गोसाले मइखलिपुत्ते सद्दालपुत्तेणं समणोवासएणं अणाढाइज्जमाणे अपरिजाणिज्जमाणे पीठफलगसेज्जासंथारट्ठाए समणस्स भगवओ महावीरस्स गुणकित्तणं करेमाणे सद्दालपुत्तं समणोवासयं एवं व०-आगए णं देवाणुप्पिया ! इहं महामाहणे ?, तए णं से सद्दालपुत्ते समणोवासए गोसालं मइखलिपुत्तं एवं व०-के णं देवाणुप्पिया ! महामाहणे ?, तए णं से गोसाले मंखलिपुत्ते सद्दालपुत्तं समणोवासयं एवं व०-समणे भगवं महावीरे महामाहणे, से केणट्ठेणं देवाणुप्पिया ! एवं वुच्चइ समणे भगवं महावीरे महामाहणे ?, एवं खलु सद्दालपुत्ता ! समणे भगवं महावीरे महामाहणे उप्पन्नणानंदसधरे जाव महियपूइए जाव तच्चकम्मसम्पयासम्पउत्ते से तेणट्ठेणं देवाणुप्पिया ! एवं वुच्चइ समणे भगवं महावीरे महामाहणे, आगए णं देवाणुप्पिया ! इहं महागोवे ?, के णं देवाणुप्पिया ! महागोवे ?, समणे भगवं महावीरे महागोवे, से केणट्ठेणं देवाणुप्पिया ! जाव महागोवे ?, एवं खलु देवाणुप्पिया ! समणे भगवं महावीरे संसाराडवीए बहवे जीवे नस्समाणे विणस्समाणे खज्जमाणे छिज्जमाणे भिज्जमाणे लुप्पमाणे विलुप्पमाणे धम्ममएणं दण्डेणं सारक्खमाणे सङ्गोवेमाणे निव्वानमहावाडं साहत्थिं सम्पावेइ से तेणट्ठेणं सद्दालपुत्ता ! एवं वुच्चइ समणे भगवं महावीरे महागोवे, आगए णं देवाणुप्पिया इहं महासत्थवाहे ?, के णं देवाणुप्पिया ! महासत्थवाहे ?, सद्दालपुत्ता ! समणे भगवं महावीरे महासत्थवाहे, से केणट्ठेणं० ?, एवं खलु देवाणुप्पिया ! समणे भगवं महावीरे संसाराडवीए बहवे जीवे नस्समाणे विणस्समाणे जाव विलुप्पमाणे उम्मग्गपडिवन्ने धम्ममएणं पन्थेणं सारक्खमाणे निव्वानमहापट्ठणाभिमुहे साहत्थिं सम्पावेइ से तेणट्ठेणं सद्दालपुत्ता ! एवं वुच्चइ समणे भगवं महावीरे महासत्थवाहे, आगए णं देवाणुप्पिया ! इहं महाधम्मकही ?, के णं देवाणुप्पिया ! महामधम्मकही ?, समणे भगवं महावीरे महाधम्मकही, से केणट्ठेणं समणे भगवं महावीरे महाधम्मकही ?, एवं खलु देवाणुप्पिया ! समणे भगवं महावीरे महइमहालयंसि संसारंसि बहवे जीवे नस्समाणे विणस्समाणे० उम्मग्गपडिवन्ने सप्पहविप्पणट्ठे मिच्छत्तबलाभिभूए अट्ठविहकम्मतमपडलपडोच्छन्ने बहूहिं अट्ठेहि य जाव वागरणेहि य चाउरन्ताओ संसारकन्ताराओ साहत्थिं नित्थारेइ से तेणट्ठेणं देवाणुप्पिया ! एवं वुच्चइ समणे भगवं महावीरे महाधम्मकही, आगए णं देवाणुप्पिया ! इहं महानिज्जामए ?, के णं देवाणुप्पिया ! महानिज्जामए ?, समणे भगवं महावीरे महानिज्जामए, से केणट्ठेणं० ?, एवं खलु देवाणुप्पिया ! समणे भगवं महावीरे संसारमहासमुदे बहवे जीवे नस्समाणे विणस्समाणे० बुद्धमाणे निबुद्धमाणे उप्पियमाणे धम्ममईए नावाए निघाणतीराभिमुहे साहत्थिं सम्पावेइ से तेणट्ठेणं देवाणुप्पिया ! एवं वुच्चइ समणे भगवं महावीरे महानिज्जामए, तए णं से सद्दालपुत्ते समणोवासए गोसालं मइखलिपुत्तं एवं व०-तुब्भे णं देवाणुप्पिया ! इयच्छेया जाव इयनिउणा इयनयवादी इयउवएसलद्धा (इयमेहाविणो पा०) इयविण्णणपत्ता पभू णं तुब्भे मम धम्मायरिएणं धम्मोवएसएणं भगवया महावीरेणं सद्धिं विवादं करेत्तए ?, नो तिणट्ठे समट्ठे, से केणट्ठेणं देवाणुप्पिया ! एवं वुच्चइ नो खलु पभू तुब्भे मम धम्मायरिएणं जाव महावीरेणं सद्धिं विवादं करेत्तए ?, सद्दालपुत्ता ! से जहानामए केई पुरिसे तरुणे जुगवं जाव निउणसिप्पोवगए एगं महं अयं वा एलयं वा सूयरं वा कुक्कुडं वा तित्तिरं वा वट्ठयं वा लावयं वा कवोयं वा कविज्जलं वा वायसं वा सेणयं वा हत्थंसि वा पायंसि वा खुरंसि वा पुच्छंसि वा पिच्छंसि वा सिंगंसि वा विसाणंसि वा रोमंसि वा जहिं जहिं गिण्हइ तहिं तहिं निच्चलं निप्फन्दं धरेइ एवामेव समणे भगवं महावीरे ममं बहूहिं अट्ठेहि य हेऊहि

य जाव वागरणेहि य जहिं जहिं गिण्हइ तहिं तहिं निप्पट्टपसिणवागरणं करेइ से तेणट्ठेणं सद्दालपुत्ता ! एवं वुच्चइ-नो खलु पभू अहं तव धम्मायरिएणं जाव महावीरेणं सद्धिं विवादं करेतए, तए णं से सद्दालपुत्ते समणोवसए गोसालं मङ्गलिपुत्तं एवं व०-जम्हा णं देवाणुप्पिया ! तुब्भं मम धम्मायरियस्स जाव महावीरस्स सन्तेहिं तच्चेहिं तहिएहिं सम्भूएहिं भावेहिं गुणक्कित्तणं करेह तम्हा णं अहं तुब्भे पाडिहारिएणं पीढजावसंथारएणं उवनिमन्तेमि नो चेव णं धम्मोत्ति वा तवोत्ति वा तं गच्छह णं तुब्भे मम कुम्भारावणेसु पाडिहारियं पीढफलंग जाव ओगिण्हित्ताणं विहरइ, तए णं से गोसाले मङ्गलिपुत्ते सद्दालपुत्तस्स समणोवासयस्स एयमट्ठं पडिसुणेइ ता कुम्भारावणेसु पाडिहारियं पीढ जाव ओगिण्हित्ताणं विहरइ, तए णं से गोसाले मङ्गलिपुत्ते सद्दालपुत्तं समणोवासयं जाहे नो संचाएइ बहूहिं आघवणाहि य पण्णवणाहि य सण्णवणाहि य विण्णवणाहि य निग्गन्थाओ पावयणाओ चालित्तए वा खोभित्तए वा विपरिणामित्तए वा ताहे सन्ते तन्ते परितन्ते पोलासपुराओ नगराओ पडिणिक्खमइ ता बहिया जणवयविहारं विहरइ । ४४ । तए णं तस्स सद्दालपुत्तस्स समणोवास-यस्स बहूहिं सील जाव भावेमाणस्स चोदस संवच्छरा वइक्कन्ता पणरसमस्स संवच्छरस्स अन्तरा वट्टमाणस्स पुव्वरत्तावरत्तकाले जाव पोसहसालाए समणस्स भगवओ महावीरस्स अन्तियं धम्मपण्णत्तिं उवसम्पजित्ताणं विहरइ, तए णं तस्स सद्दालपुत्तस्स समणोवासयस्स पुव्वरत्तावरत्तकाले एगे देवे अन्तियं पाउब्भवित्था, तए णं से देवे एगं महं नीलुप्पल जाव असिं गहाय सद्दालपुत्तं समणोवासयं एवं व०-जहा चुल्लणीपियस्स तहेव देवो उवसग्गं करेइ नवरं एक्केके पुत्ते नव मंससोल्लए करेइ जाव कणीयसं घाएइ ता जाव आयञ्चइ, तए णं से सद्दालपुत्ते समणोवासए अभीए जाव विहरइ, तए णं से देवे सद्दालपुत्तं समणोवासयं अभीयं जाव पासित्ता चउत्थंपि सद्दालपुत्तं समणोवासयं एवं व०-हंभो सद्दालपुत्ता समणोवा-सया ! अपत्थियपत्थया जाव न भञ्जसि तओ ते जा इमा अग्गिमित्ता भारिया धम्मसहाइया धम्मविइजिया धम्माणुरागरत्ता समसुहदुक्खसहाइया तं ते साओ गिहाओ नीणेमि ता तव अग्गओ घाएमि ता नव मंससोल्लए करेमि ता आदाणभरियंसि कडाहयंसि अइहेमि ता तव गायं मंसेण य सोणिएण य आयञ्चामि जहा णं तुमं अट्टदुहट्ट जाव ववरोविज्जसि, तए णं से सद्दालपुत्ते समणोवासए तेणं देवेणं एवं वुत्ते समाणे अभीए जाव विहरइ, तए णं से देवे सद्दालपुत्तं समणोवासयं दोच्चंपि तच्चंपि एवं व०-हंभो सद्दालपुत्ता समणोवासया ! तं चेव भणइ, तए णं तस्स सद्दालपुत्तस्स समणोवासयस्स तेणं देवेणं दोच्चंपि तच्चंपि एवं वुत्तस्स समाणस्स अयं अज्झत्थिए० समुप्पन्ने, एवं जहा चुल्लणीपिया तहेव चिन्तेइ, जेणं ममं जेट्ठं पुत्तं० जेणं ममं मज्झिमयं पुत्तं० जेणं ममं कणीयसं पुत्तं जाव आयञ्चइ जावियं णं ममं इमा अग्गिमित्ता भारिया समसुहदुक्खसहाइया तंपिय इच्छइ साओ गिहाओ नीणेत्ता ममं अग्गओ घाएत्तए तं सेयं खलु ममं एयं पुरिसं गिण्हित्तएत्तिकट्टु उद्दाइए जहा चुल्लणीपिया तहेव सव्वं भाणियव्वं, नवरं अग्गिमित्ता भारिया कोलाहलं सुणित्ता भणइ-सेसं जहा चुल्लणीपियावत्तवया नवरं अरुणभू(चू)ए विमाणे उववन्ने जाव महाविदेहे वासे सिज्झिहिइ०, निक्खेवो । ४५ ॥ सद्दालपुत्तज्झयणं ७ ॥ अट्टमस्स उक्खेवओ, एवं खलु जम्बू ! तेणं कालेणं० रायगिहे नयरे गुणसीले चेइए सेणिए राया, तत्थ णं रायगिहे महासयए नामं गाहावई परिवसइ अड्ढे जहा आणन्दो नवरं अट्ट हिरण्णकोडीओ सकंसाओ निहाणपउत्ताओ अट्ट हिरण्णकोडीओ सकंसाओ वुड्ढिपउत्ताओ अट्ट हिरण्णकोडीओ सकंसाओ पवित्थरपउत्ताओ अट्ट वया दसगोसाहस्सिएणं वएणं, तस्स णं महासयगस्स रेवईपामोक्खाओ तेरस भारि-याओ होत्था अहीण जाव सुरूवाओ, तस्स णं महासयगस्स रेवईए भारियाए कोलघरियाओ अट्ट हिरण्णकोडीओ अट्ट वया दसगोसाहस्सिएणं वएणं होत्था, अवसेसाणं दुवालसण्हं भारियाणं कोलघरिया एगमेगा हिरण्णकोडी एगमेगे य वए दसगोसाहस्सिएणं वएणं होत्था । ४६ । तेणं कालेणं० सामी समोसढे परिसा निग्गया जहा आणन्दो तहा निग्गच्छइ तहेव सावयधम्मं पडिवज्जइ नवरं अट्ट हिरण्णकोडीओ सकंसाओ उच्चारेइ अट्ट वया, रेवईपामोक्खाहिं तेरसहिं भारियाहिं अवसेसं मेहुणविहिं पच्चक्खाइ, सेसं सव्वं तहेव, इमं च णं एयारूवं अभिग्गहं अभिगिण्हइ-कल्लाकल्लिं कप्पइ मे बेदोणियाए कंसपाईए हिरण्णभरियाए संववहरित्तए, तए णं से महासयए समणोवासए जाए अभिगयजीवाजीवे जाव विहरइ, तए णं समणे भगवं महावीरे बहिया जणवयविहारं विहरइ । ४७ । तए णं तीसे रेवईए गाहावइणीए अन्नया कयाई पुव्वरत्तावरत्तकालसमयंसि कुडुम्ब जाव इमेयारूवे अज्झत्थिए०-एवं खलु अहं इमासिं दुवालसण्हं सवत्तीणं विघाएणं नो संचाएमि महासयएणं समणोवासएणं सद्धिं उरालाइं माणुस्सयाइं भोगभोगाइं भुञ्जमाणी विहरित्तए तं सेयं खलु ममं एयाओ दुवा-लसवि सवत्तियाओ अग्गिप्पओगेण वा सत्थपओगेण वा विसप्पओगेण वा जीवियाओ ववरोवित्ता एयासिं एगमेगं हिरण्णकोडिं एगमेगं वयं च सयमेव उवसम्पजित्ताणं महासयएणं समणोवासएणं सद्धिं उरालाइं जाव विहरित्तए, एवं सम्पेहेइ ता तासिं दुवालसण्हं सवत्तीणं अन्तराणि य छिदाणि य विवराणि (विरहाणि प्र०) य पडिजागरमाणी विहरइ, तए णं सा रेवई गाहावइणी अन्नया कयाई तासिं दुवालसण्हं सवत्तीणं अन्तरं जाणित्ता छ सवत्तीओ सत्थपओगेण उद्वेइ ता छ सवत्तीओ विसप्पओगेण उद्वेइ ता तासिं दुवालसण्हं सवत्तीणं

४९९ उपासकदशांगं, - अ-५५१२५७१ - ८

कोलघरियं एगमेगं हिरण्णकोडिं एगमेगं च वयं सयमेव पडिवज्जइ ता महासयएणं समणोवासएणं सद्धिं उरालाई भोगभोगाई भुञ्जमाणी विहरइ, तए णं सा रेवई गाहावइणी मंसलो-
लुया मंसेसु मुच्छिया जाव अज्झोववन्ना बहुविहेहिं मंसेहि य सोल्लेहि य तलिएहि य भजिएहि य सुरं च महं च मेरगं च मज्जं च सीधुं च पसन्नं च आसाएमाणी० विहरइ । ४८ । तए
णं रायगिहे नयरे अन्नया कयाई अमाघाए घुट्टे यावि होत्था, तए णं सा रेवई गाहावइणी मंसलोलुया मंसेसु मुच्छिया० कोलघरिए पुरिसे सद्दावेइ ता एवं व०-तुब्भे देवाणुप्पिया !
मम कोलघरिएहिं तो वएहिं तो कल्लाकल्लिं दुवे दुवे गोणपोयए उदवेह ता ममं उवणेह, तए णं ते कोलघरिया पुरिसा रेवईए गाहावइणीए तहत्ति एयमट्ठं विणएणं पडिसुणन्ति ता रेव-
ईए गाहावइणीए कोलघरिएहिं तो वएहिं तो कल्लाकल्लिं दुवे दुवे गोणपोयए वहेन्ति ता रेवईए गाहावइणीए उवणेन्ति तए णं सा रेवई गाहावइणी तेहिं गोणमंसेहिं सोल्लेहि य० सुरं
च० आसाएमाणी० विहरइ । ४९ । तए णं तस्स महासयगस्स समणोवासगस्स बहूहिं सील जाव भावेमाणस्स चोदस संवच्छरा वडक्कन्ता एवं तहेव जेट्ठपुत्तं ठवेइ जाव पोसहसालाए
धम्मपण्णत्तिं उवसम्पजित्ताणं विहरइ, तए णं सा रेवई गाहावइणी मत्ता लुलिया विइण्णकेसी उत्तरिजयं विकड्ढेमाणी २ जेणेव पोसहसाला जेणेव महासयए समणोवासए तेणेव
उवागच्छइ ता मोहुम्मायजणणाई सिङ्गारियाई इत्थिभावाई उवदंसेमाणी २ महासययं समणोवासयं एवं व०-हंभो महासयया ! समणोवासया धम्मकामया पुण्णकामया सग्गकामया
मोक्खकामया धम्मकङ्किया० धम्मपिवासिया० किण्णं तुब्भं देवाणुप्पिया ! धम्मेण वा पुण्णेण वा सग्गेण वा मोक्खेण वा जण्णं तुमं मए सद्धिं उरालाई जाव भुञ्जमाणे नो विहरसि ?,
तए णं से महासयए समणोवासए रेवईए गाहावइणीए एयमट्ठं नो आढाइ नो परियाणाइ अणाढायमाणे अपरियाणमाणे तुसिणीए धम्मज्झाणोवगए विहरइ, तए णं सा रेवई गाहा-
वइणी महासययं समणोवासयं दोच्चं पि तच्चं पि एवं व०-हंभो तं चेव भणइ सोवि तहेव जाव अणाढायमाणे अपरियाणमाणे विहरइ, तए णं सा रेवई गाहावइणी महासयएणं समणो-
वासएणं अणाढाइजमाणी अपरियाणिजमाणी जामेव दिसं पाउब्भूया तामेव दिसं पडिगया । ५० । तए णं से महासयए समणोवासए पढमं उवासगपडिमं उवसम्पजित्ताणं विहरइ,
पढमं० अहासुत्तं जाव एक्कारसडवि, तए णं से महासयए समणोवासए तेणं उरालेणं जाव किसे धमणिसन्तए जाए, तए णं तस्स महासययस्स समणोवासयस्स अन्नया कयाई पुव्व-
रत्तावरत्तकाले धम्मजागरियं जागरमाणस्स अयं अज्झत्थिए० एवं खलु अहं इमेणं उरालेणं जहा आणन्दो तहेव अपच्छिममारणन्तियसंलेहणाझूसियसरीरे भत्तपाणपडियाइक्खिए
कालं अणवकल्लमाणे विहरइ, तए णं तस्स महासयगस्स समणोवासगस्स सुभेणं अज्झवसाणेणं जाव खओवसमेणं ओहिणाणे समुप्पन्ने पुरत्थिमेणं लवणसमुदे जोयणसाहस्सियं खेत्तं
जाणइ पासइ, एवं दक्खिणेणं पच्चत्थिमेणं उत्तरेणं जाव चुल्लहिमवन्तं वासहरपय्यं जाणइ पासइ अहे इमीसे रयणप्पभाए पुढवीए लोलुयच्चुयं नरयं चउरासीइवाससहस्सट्ठिइयं जाणइ
पासइ । ५१ । तए णं सा रेवई गाहावइणी अन्नया कयाई मत्ता जाव उत्तरिजयं विकड्ढेमाणी २ जेणेव महासयए समणोवासए तेणेव उवागच्छइ ता महासययं तहेव भणइ जाव
दोच्चं पि तच्चं पि एवं व०-हंभो तहेव, तए णं से महासयए समणोवासए रेवईए गाहावइणीए दोच्चं पि तच्चं पि एवं वुत्ते समाणे आसुरुत्ते० ओहिं पउज्जइ ता ओहिणा आभोएइ ता रेवई
गाहावइणिं एवं व०-हंभो रेवई ! अपत्थियपत्थिए० एवं खलु तुमं अन्तो सत्तरत्तस्स अलसएणं वाहिणा अभिभूया समाणी अट्ठदुहट्ठवसट्ठा असमाहिपत्ता कालमासे कालं किच्चा अहे
इमीसे रयणप्पभाए पुढवीए लोलुयच्चुए नरए चउरासीइवाससहस्सट्ठिइएसु नेरइएसु नेरइयत्ताए उववज्जिहिसि, तए णं सा रेवई गाहावइणी महासयएणं समणोवासएणं एवं वुत्ता
समाणी एवं व०-रुट्ठे णं ममं महासयए समणोवासए हीणे णं ममं महासयए समणो० अवज्झाया णं अहं महासयएणं समणोवासएणं न नज्जइ णं अहं केणवि कुमारेणं मारिजिस्सा-
मित्तिकट्ठु भीया तत्था तसिया उच्चिग्गा सञ्जायभया सणियं २ पच्चोसक्कइ ता जेणेव सए गिहे तेणेव उवागच्छइ ता ओहय जाव झियाइ, तए णं सा रेवई गाहावइणी अन्तो सत्तर-
त्तस्स अलसएणं वाहिणा अभिभूया अट्ठदुहट्ठवसट्ठा कालमासे कालं किच्चा इमीसे रयणप्पभाए पुढवीए लोलुयच्चुए नरए चउरासीइवाससहस्सट्ठिइएसु नेरइएसु नेरइयत्ताए उववन्ना
। ५२ । तेणं कालेणं० समणे भगवं महावीरे समोसरणं जाव परिसा पडिगया, गोयमाइ ! समणे भगवं महावीरे० एवं व०-एवं खलु गोयमा ! इहेव रायगिहे नयरे ममं अन्तेवासी
महासयए नामं समणोवासए पोसहसालाए अपच्छिममारणन्तियसंलेहणाझूसणाझूसियसरीरे भत्तपाणपडियाइक्खिए कालं अणवकल्लमाणे विहरइ, तए णं तस्स महासयगस्स रेवई गाहा-
वइणी मत्ता जाव विकड्ढेमाणी २ जेणेव पोसहसाला जेणेव महासयए तेणेव उवागच्छइ ता मोहुम्माय जाव एवं व०-तहेव जाव दोच्चं पि तच्चं पि एवं व०, तए णं से महासयए समणो-
वासए रेवईए गाहावइणीए दोच्चं पि तच्चं पि एवं वुत्ते समाणे आसुरुत्ते० ओहिं पउज्जइ ता ओहिणा आभोएइ ता रेवई गाहावइणिं एवं व०-जाव उववज्जिहिसि, नो खलु कप्पइ
गोयमा ! समणोवासगस्स अपच्छिमजावझूसियसरीरस्स भत्तपाणपडियाइक्खियस्स परो सन्तेहिं तच्चहिं तहिएहिं सब्भूएहिं अणिट्ठेहिं अकन्तेहिं अप्पिएहिं अमणुण्णेहिं अमणामेहिं
वागरणेहिं वागरित्तए, तं गच्छ णं देवाणुप्पिया ! तुमं महासययं समणोवासयं एवं वयाहि-नो खलु देवाणुप्पिया ! कप्पइ समणोवासगस्स अपच्छिम जाव भत्तपाणपडियाइ- (१२५)

किखयस्स परो सन्तेहिं जाव वागरित्तए, तुमे य णं देवाणुप्पिया ! रेवई गाहावइणी सन्तेहिं० अणिट्टेहिं० वागरणेहिं वागरिया तं णं तुमं एयस्स ठाणस्स आलोएहि जाव जहारिहं च पायच्छित्तं पडिवज्जाहि, तए णं से भगवं गोयमे समणस्स भगवओ महावीरस्स तहत्ति एयमट्ठं विणएणं पडिसुणेइ त्ता तओ पडिणिक्खमइ त्ता रायगिहं नयरं मज्झमज्झेणं अणुप्प-
 विसइ त्ता जेणेव महासयगस्स समणोवासयस्स गिहे जेणेव महासयए समणोवासए तेणेव उवागच्छइ, तए णं से महासयए समणोवासए भगवं गोयमं एज्जमाणं पासइ त्ता हट्टजाव-
 हियए भगवं गोयमं वन्दइ नमंसइ, तए णं से भगवं गोयमे महासययं समणो० एवं व०-एवं खलु देवाणुप्पिया ! समणे भगवं महावीरे एवमाइक्खइ भासइ पणवेइ परूवेइ-नो खलु
 कप्पइ देवाणुप्पिया ! समणोवासगस्स अपच्छिम जाव वागरित्तए, तुमे णं देवाणुप्पिया ! रेवई गाहावइणी सन्तेहिं जाव वागरिया तं णं तुमं देवाणुप्पिया ! एयस्स ठाणस्स आलोएहि
 जाव पडिवज्जाहि, तए णं से महासयए समणोवासए भगवओ गोयमस्स तहत्ति एयमट्ठं विणएणं पडिसुणेइ त्ता तस्स ठाणस्स आलोयइ जाव आहारिहं च पायच्छित्तं पडिवज्जइ,
 तए णं से भगवं गोयमे महासयगस्स समणोवासयस्स अन्तियाओ पडिणिक्खमइ त्ता रायगिहं नगरं मज्झमज्झेणं निग्गच्छइ त्ता जेणेव समणे भगवं महावीरे तेणेव उवागच्छइ त्ता
 समणं भगवं महावीरं वन्दइ नमंसइ त्ता सज्जमेणं तवसा अप्पाणं भावेमाणे विहरइ, तए णं समणे भगवं महावीरे अन्नया कयाई रायगिहाओ नयराओ पडिणिक्खमइ त्ता बहिया
 जणवयविहारं विहरइ । ५३ । तए णं से महासयए समणोवासए बहूहिं सील जाव भावेत्ता वीसं वासाइं समणोवासगपरियायं पाउणित्ता एक्कारस उवासगपडिमाओ सम्मं काएणं
 फासित्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदेत्ता आलोइयपडिक्कन्ते समाहिपत्ते कालमासे कालं किच्चा सोहम्मे कप्पे अरुणवडिंसए विमाणे देवत्ताए
 उववन्ने चत्तारि पलिओवमाइं ठिई महाविदेहे वासे सिज्झिहिइ० । निक्खेवो । ५४ ॥ महासयगज्झयणं ८ । नवमस्स उक्खेवओ, एवं खलु जम्बू ! तेणं कालेणं० सावत्थी नयरी कोट्टए
 चेइए जियसत्तू राया, तत्थ णं सावत्थीए नयरीए नन्दिणीपिया नामं गाहावई परिवसइ अड्ढे० चत्तारि हिरण्णकोडीओ निहाणपउत्ताओ चत्तारि हिरण्णकोडीओ वुड्ढिपउत्ताओ
 चत्तारि हिरण्णकोडीओ पवित्थरपउत्ताओ चत्तारि वया दसगोसाहस्सिएणं वएणं अस्सिणी भारिया सामी समोसढे जहा आणन्दो तहेव गिहिधम्मं पडिवज्जइ, सामी बहिया विहरइ,
 तए णं से नन्दिणीपिया समणोवासए जाए जाव विहरइ, तए णं तस्स नन्दिणीपियस्स समणोवासयस्स बहूहिं सीलवयगुण जाव भावेमाणस्स चोइस संवच्छराइं वइक्कन्ताइं तहेव
 जेठ्ठं पुत्तं ठवेइ धम्मपण्णत्तिं० वीसं वासाइं परियागं नाणित्तं अरुणगवे विमाणे उववाओ महाविदेहे वासे सिज्झिहिइ०, निक्खेवो । ५५ ॥ नन्दिणीपियज्झयणं ९ ॥ दसमस्स उक्खेवओ,
 एवं खलु जम्बू ! तेणं कालेणं० सावत्थी नयरी कोट्टए चेइए जियसत्तू राया, तत्थ णं सावत्थीए नयरीए सालिहीपिया नामं गाहावई परिवसइ अड्ढे दित्ते० चत्तारि हिरण्णकोडीओ
 निहाणपउत्ताओ चत्तारि हिरण्णकोडीओ वुड्ढिपउत्ताओ चत्तारि हिरण्णकोडीओ पवित्थरपउत्ताओ चत्तारि वया दसगोसाहस्सिएणं वएणं फग्गुणी भारिया सामी समोसढे जहा
 आणन्दो तहेव गिहिधम्मं पडिवज्जइ, जहा कामदेवो तहा जेठ्ठं पुत्तं ठवेत्ता पोसहसालाए समणस्स भगवओ महावीरस्स धम्मपण्णत्तिं उवसम्पज्जित्ताणं विहरइ, नयरं निरुवसग्गओ
 एक्कारसवि उवासगपडिमाओ तहेव भाणियवाओ एवं कामदेवगमेणं नेयव्वं जाव सोहम्मे कप्पे अरुणकीले विमाणे देवत्ताए उववन्ने चत्तारि पलिओवमाइं ठिई महाविदेहे वासे सि-
 ज्झिहिइ० । ५६ । दसण्हवि पणरसमे संवच्छरे वट्टमाणं चिन्तादसण्हवि वीसं वासाइं समणोवासयपरियाओ । एवं खलु जम्बू ! समणेणं जाव संपत्तेणं सत्तमस्स अङ्गस्स उवासग-
 दसाणं दसमस्स अज्झयणस्स अयमट्ठे पण्णत्ते । ५७ । ‘वाणियगामे चम्पा दुवे य वाणारसीइ नयरीए । आलंभिया य पुरवरी कम्पिहपुरं च बोद्धव्वं ॥ २ ॥ पोलासं रायगिहं सावत्थीए
 पुरीएँ दोन्नि भवे । एए उवासगाणं नयरा खलु होन्ति बोद्धवा ॥ ३ ॥ सिवनन्द-भइ-सामा-धन्न-बहुल-पूस-अग्गिमित्ता य । रेवइ-अस्सिणि तह फग्गुणी य भज्जाण नामाइं ॥ ४ ॥
 ओहिण्णाण-पिसाए माया वाहि-धण-उत्तरिज्जे य । भज्जा य सुवया दुवया निरुवसग्गया दोन्नि ॥ ५ ॥ अरुणे अरुणाभे खलु अरुणप्पह अरुणकन्त-सिट्ठे य । अरुणज्झए य छट्ठे भू-
 (प्र० चू)य-वडिंसे गवे कीले ॥ ६ ॥ (× चाली सट्ठिं असीई सट्ठी सट्ठी य सट्ठिं दससहस्सा । असिई चत्ता चत्ता वए वइयाण सहसाणं ॥ ७ ॥ बारस अट्टारस चउवीसं तिविहं अट्टारसाइ वि-
 न्नेयं । धन्नेण तिचोवीसं बारस बारस य कोडीओ ॥ ८ ॥ उल्लण-दन्तवण-फले अब्भिङ्गणुवट्टणे सिणाणे य । वत्थ-विलेवण-पुप्फे आभरणं धूव-पेज्जाइ ॥ ९ ॥ भक्खोयण-सूय-घए सागे माहुर-
 जेमणऽण्ण-पाणे य । तम्बोले इगवीसं आणन्दाईण अभिग्गहा ॥ १० ॥ उड्ढं सोहम्म पुरे लोलूए अहे उत्तरे हिमवन्ते । पञ्चसए तह तिदिसिं ओहिण्णाणं तु दसगस्स ॥ ११ ॥ दंसण-वय-सामा-
 इय-पोसह-पडिमा-अबम्भ-सच्चित्ते । आरम्भ-पेस-उदिट्टवज्जए समणभूए य ॥ १२ ॥ इक्कारस पडिमाओ वीसं परियाओ अणसणं मासे । सोहम्मे चउपलिया महाविदेहम्मि सिज्झिहिइ
 ॥ १३ ॥ ×) ५८ ॥ उवासगदसाओ समत्ताओ ॥ उवासगदसाणं सत्तमस्स अङ्गस्स एगो सुयखन्धो दस अज्झयणा एकसरगा दससु चेव दिवसेसु उदिस्सन्ति तओ सुयखन्धो समुदिस्सइ अणु-
 ५० १ उपासकदशांगं, अज्झयणं - १०

णविज्जइ, दोसु दिवसेसु अङ्गं तहेव। ५९॥ साल्हीपियज्झयणं १०॥ इति सप्तमाङ्गं श्रीसिद्धाद्रितल्लहट्टिकागतशिलोत्कीर्णसकलागमोपेतश्रीवर्धमानजैनागममंदिरे २४६ टवैशाखशुक्लेकादश्यां

संशोधकाः श्रीतपोगच्छेशागमोद्धारकाचार्यश्रीआनन्दसागरसूरिवर्याः तत्पट्टधेरमालवदेशोद्धारकाचार्यश्रीचन्द्रसागरसूरिपट्टधर-सागुरगणेशाचार्यश्रीदेवेन्द्रसागरसूरिवर्योपदेशात्